

省慈編

上海土山灣印書館印行

Nº 336



3 1773 1737 1

省慈編

天主降生一千九百三十四年

第四版

1500

上海土山灣印書館印

No336

MG
B976.1
355

上海主教惠

重准

聖母月新編

雲間耶穌會士

邑虛蔣
固愚龔

柴升

譯

弁言

省慈編一書，係聖母月內，每日之默想也。摘譯聖師亞爾方
騷利誥理，及耶穌會學士方濟各霸亞來，安多尼，亞利亞斯，
羅道味高，代邦戴著作而成。編分起工，繼工，終工，三節。首日
起工，畧叙敬禮之分。繼工二十七日，有上，中，下，三九之別。上
九，默想聖母行實。中九，默想聖母諸德。下九，默想聖母名號。
終工三日，簡陳敬禮之法。書中字句平庸，文理粗淺，淺學之

士亦能一目了然。儘收實效。倘有志敬禮聖母者。不以書之
譏陋而玩忽之。庶可得農省之意矣。

省慈編目錄

起工

第一日

敬禮之勞

見一張

繼工
上九

第二日

聖母始胎

見八張

第三日

聖母聖誕

見一六張

第四日

聖母獻堂

見二三張

第五日

聖母在堂

見二九張

第六日

聖母領報

見三六張

第七日

聖母往見

見四三張

繼工
九中

- | | | |
|-----|------|------|
| 第八日 | 聖母聖產 | 見四九張 |
| 第九日 | 聖母取潔 | 見五五張 |
| 第十日 | 聖母升天 | 見六一張 |
| 十一日 | 聖母謙德 | 見六八張 |
| 十二日 | 聖母信德 | 見七六張 |
| 十三日 | 聖母望德 | 見八二張 |
| 十四日 | 聖母愛主 | 見八八張 |
| 十五日 | 聖母愛人 | 見九五張 |

十六日 聖母神貧 見一〇一張

十七日 聖母貞潔 見一〇八張

十八日 聖母順命 見一一五張

十九日 聖母忍耐 見一二一張

繼工
九下
二十日 聖瑪利亞 見一二九張

廿一日 天主聖母 見一三七張

廿二日 世人之母 見一四三張

廿三日 吾等之望 見一五二張

省慈編 目錄

陸

廿四日 進教之佑 見一六〇張

廿五日 大能之母 見一六七張

廿六日 仁慈之母 見一七四張

廿七日 當求之母 見一八〇張

廿八日 善終之保 見一八七張

終工 廿九日 怙恃愛慕救靈三法 見一九四張

三十日 感謝恭敬熱心三法 見二〇一張

卅一日 克己則效傳揚三法 見二〇七張

一日敬禮之分

一、所敬者何人。○欲知聖母當敬，先當知瑪利亞爲位隆德備，萬善兼全之貞女。論其位，乃天地母皇，天主聖母，親生聖子耶穌，乳育之，而顧復之。故其在世，神聖爲之瞻仰，天地爲之驚奇，魔鬼爲之震懼。今在天堂，居母后之位，惟天主聖子居其上，其餘神聖皆在其下。且天主付彼極大之權，彼所欲者，莫不遂意。余靈，汝敬帝皇官府，爲彼世上之尊貴，而聖母在天，有非常超性之尊貴，竟漫然不知敬耶。論其德，則聖母

爲宗徒致命精修童貞諸聖之后以其兼有諸神聖之德而遠勝之也。世有慕德者一見有德之人卽傾心悅服愛之如兄弟敬之如父母。余靈爾知聖母有如許大德竟漠然不動豈得爲有心人耶。至論其超性本性諸美善一語已足明徵。蓋聖母懷孕吾主其聖胎爲上天下地最美麗之宮殿稍有瑕疵卽不稱其位而主不屑居。故聖人云天主造聖母若窮其無窮之能以受造者所能有之美善一一施之聖母。余靈汝之癡狂奚似。見有絲毫美善之人敬之惟恐不及。見聖母

兼備美善、不但不敬、且侮慢交加、以爲小事、爾今愧悔前非、定志以後恭敬聖母、毋稍忽。

二、敬者何人。○吾人在世、爲聖母之僕、聖母之子。如可憐之窮人、極需聖母恩保者、故吾恭敬聖母、不容稍緩。一、爲聖母之僕。蓋天主擢彼爲天地元后、卽付彼掌握萬有之權。故凡爲天主之僕、卽爲聖母之僕。而僕役之分、乃鞠躬盡瘁、敬主人而兼敬主母。否則、不但不得主人之歡、并不免一朝見棄。噫、使吾人不敬聖母、而見棄於主、將何地可逃主怒。無地可

逃、卽無地不當恭敬聖母、以中天主之心。二、吾儕爲聖母之子。蓋吾一生、均屬聖母懷抱之時、領至天堂、然後免懷。有難、聖母救之。有憂、聖母慰之。邪魔攻敵、聖母却拒之。或不幸而顛仆、聖母扶起之。種種慈母之心腸、較之生身之母、不啻萬倍。如是而爲子者、不知酬報、不知敬禮、忤逆孰甚焉。余靈戒之哉。若欲審判時、不以忤逆見斥、當於今時、孝敬聖母。三、吾儕窮人、急需聖母恩保。蓋世界如汪洋幽谷、吾儕居此、有覆舟沉溺之險、有龍吞虎噬之危。設無聖母作吾舟師、親來救

援不知幾被魔毒陷於地獄矣。幸有聖母扶助吾儕，能脫去世累，勇走天堂道路。是聖母實爲吾再生之母，極大之恩保。稍有良心，焉得不敬。

三、善備敬禮之法。○一、滌罪。蓋人負重罪，卽爲吾主之仇，因之亦爲聖母之仇。旣爲其仇，卽不論行何善工，不能全悅聖母之心，不能全收敬禮之益。故誠心過聖母月者，必以滌罪爲先。嚴查良心內，有何宿罪未告，或告而未妥否。有何罪機未避，惡習未改否。如有，卽投神父足下，痛告前非，真心定改。

倘蒙天主宏恩，心無大罪，亦必以小罪，爲限阻聖寵之源，而懊悔定改，俾中聖母之心，全獲神靈之益。余靈汝將曷爲，請爾自問良心。二、奉獻。以身靈諸有，及一月內將修之德行，將立之善功，皆盡獻無遺。且獻以全心、全意、悅樂怡然。母回心戀惜，母獻之復取。三、豫定一月內，行何善工，修何德行，改何毛病，去何惡習。如此一月內，織成一美麗花冠。月之末日，加諸聖母之首，以表孝子之情。聖母必惠而好我，納我禮儀，書我名於天冊，永不遺忘矣。福哉聖母孝子，獲此極善之機，而

不輕過也。余靈汝年來遇聖母月，往往自忖曰：來歲始真心敬禮，尚不爲晚。今茲適逢其會，又將漫然虛度耶？戒之哉！機緣速過，去者不來，來者無定。恐此際一去，永不復反，至此而悔悟，遲矣晚矣。

二日聖母始胎

一、聖母爲天主聖父之女。○聖母旣爲聖父之女，自不宜染原罪之污。亞立山地總牧，聖第阿尼削曰：聖母爲生活之女。以其生無原罪，神靈無死亡之患，非若他女生於原罪，而即有死亡之苦。是故稱爲生活之女，卽知其無原罪之污矣。況天主聖父，自無始之始，一定聖子降生，卽選聖母爲聖子之母，以助聖子救世之工。故聖母始胎時，賜其滿被聖寵，而原罪無隙可入。聖伯爾納多比聖母爲諾厄之舟。蓋諾厄之舟，

救人洪水之溺，得肉身之生命。而聖母救人罪戾之溺，得靈魂之生命。所異者，彼所救者寡，而此所救者衆耳。余靈汝懼沉於罪惡，而失生命，何不恃聖母救援汝耶？且聖母爲人中保，當爲吾求主，赦免吾罪。故不能與天主爲仇，更不能與吾同罪。在昔亞當犯罪後，主責蛇曰：「子將置怨於爾及女子中，并彼之子與汝之類。」彼將踏爾首。聖人云：「此女，卽聖母。」聖母旣當足躡魔頂，自宜不爲魔鬼所勝，而作彼奴婢。倘聖母染原罪，將必爲魔鬼戰勝，而成魔鬼之奴婢矣。聖師之意，類多

如此故使教會未定聖母無原罪爲信德道理亦當深信無疑。況多年來教皇已欽定爲當信之端乎。余靈汝縱不得如聖母無染原罪汝獨不能戰勝三仇踏魔頂而爲聖父鍾愛之子乎。勉之哉彼之寵恩在邇母慮不及。

二、聖母爲天主聖子之母。○聖母旣爲聖子之母聖子不應許已母亦沾原罪。凡人受生以前不能選定一人爲已所生之母。使有一能之者必願選皇后爲母而不願選奴婢。聖子耶穌爲活天主子旣能憑己選擇必願選至潔者純全無瑕。

者爲己生母而不願選罪犯也。明矣。自古明人從聖保祿宗徒之意曰：耶穌當離諸罪人。尙有一負罪者爲其母。斯言幾等浮談矣。聖盎博羅削因聖母至潔，稱其爲上天之器。非因聖母本性自天而降，實因其滿被聖寵，胎懷榮福之王耳。天主聖父偕聖若翰顯於聖婦彼利日大云：榮福之王，惟宜居於至美至潔之器。聖母旣爲天主聖居，自宜至潔而無原罪之污。況耶穌之軀體，因聖母而成。聖奧斯定曰：基利斯督之體，卽聖母之體。使聖母有原罪，則耶穌之體亦爲罪污之體。

矣。奚可哉。聖人有言。聖母之德。足爲天主之母。則其德之純全。德之超越。不難推想。又云。若聖母有一小罪。已不足爲天主之母。原罪。大罪也。使其有之。尙足爲主母乎。是必不能。聖奧斯定曰。一言瑪利亞。請不問罪。可也。蓋其聖德。旣能爲吾主之母。自然罪戾莫容。聖達彌盎等繼之曰。非然者。聖子將羞慚無地。故如德亞人。雖稱耶穌爲貧人之子。從未稱爲罪犯之子。蓋稱之爲貧人之子。不足爲辱。而稱之爲罪犯之子。則辱莫大矣。天主前因撒落滿云。奸惡之靈。予終不入。有罪

之身。子終不居。汝安得妄想聖子肯居有罪之胎耶。聖教會謝主曰。爾不厭惡童貞之胎。奧斯定繼之曰。曷故。因聖母之胎。非如別位聖女之胎。蓋彼雖爲聖女。尙有原罪。而聖母獨無。故聖子不厭惡耳。余靈。汝欲天主降汝心中。宜滌除爾心之污。不特大罪盡除。卽小罪亦宜脫去。果如此。天主將居爾心。如居聖母胎中。而不厭惡矣。

三、聖母爲天主聖神淨配。○天主聖神。因已聖寵。安息聖母心中。選爲淨配。作天地之元后。爰親自降來。以聖母淨血。成

基利斯督之淨軀。倘聖母染原罪之污。與凡人無異。聖神豈若是肯來乎。豈肯以聖經之言稱之曰。爾是全美麗。瑕不在爾乎。因其獨無原罪。故稱之爲扃園。稱之爲封泉。聖熱羅尼莫曰。聖母稱爲扃園。封泉。因魔鬼從未入其靈。以污穢之。是以身靈永潔。如扃之園。不受外侵。如封之泉。恒清不濁。聖伯爾納多亦如是言。按諸聖明師之說。聖母所得聖神恩寵。超諸神人之上。故天神及亞當所受之聖寵。聖母無一不備。卽亞當所有無辜者。聖母亦一一有之。是以天神讚美曰。亞

物滿被聖寵者。聖多瑪斯云。聖母所有聖寵。若是其多且大。不特其靈滿被無缺。卽其身亦若滿被矣。噫。余靈。汝欲聖神。賜爾聖寵。安居爾心。永爲爾淨配乎。汝果願之。宜謹防爾心。不爲魔鬼出入。而後可。至今何如。爾慎思之。以後何如。爾慎定之。

三日聖母聖誕

一、聖母聖誕，衆民歡樂。○富貴之家生子，親戚友朋，莫不羣喜羣賀。其實可哭可憐，因其爲天主之仇也。獨聖母不然。誕生之初，原罪並無，不啻天神之淨。福德純全，過於聖人之聖。此乃人世間，眞大可喜，大可賀之事。況吾人皆天主之仇，因有聖母，得免此仇，能不喜賀。故瑪利亞誕生，衆人宜共樂共慶。聖人恒云，聖母出世，正若曉星顯於東方，隨卽太陽現出，始照大地人民，俾皆夢醒興工。因向聖母，讚揚其聖誕曰，福

哉爾聖誕。爾乃普世之黎明。黎明爲去夜之終，來日之始。爾生斯世，去嚮世之苦，招現世之安。去幽暗而帶聖光。爾未生之前，天主未降，未顯於世。旣出，則天主降生，而興救世之工。天主母，福哉爾聖誕。余靈何不偕天神聖人，共喜共慶，讚美爾母之誕日。

二、聖母聖誕。滿受主寵。○聖寵之於他聖，若滴水。而於聖母，若大雨。蓋聖母生時所受聖寵，不特超一聖一賢，并超羣聖羣賢。此乃超性學士之公論，必然之定理。耶穌會司鐸貝輩

述曰、有本會博學士蘇亞類斯、證聖母所有之聖寵、超諸神聖共有之聖寵。聖母卽不勝忻喜、親遣同會修士瑪爾定古的、謁類斯代謝之。足證此道之確乎真實也。且聖母爲天主之母、其位高妙至極。與天主第二位結合人性之高妙、若可相爲比例、爲此當受至大之聖寵。蓋天主付人之聖寵、悉如其將受之責任。責任大、所付之聖寵亦大。聖母爲天主之母、其責任可謂大而無比。夫旣大而無比、則其所受之聖寵、亦宜大而無比。故聖多瑪斯云、聖母受聖寵之能、雖爲有限、而

天主付聖寵之能，乃爲無限。然天主愈付聖寵，聖母愈能受主聖寵。故其所受聖寵，幾若與天主同爲無窮。本篤飛爾第諾一言蔽之曰：聖母受主聖寵之量，一如天主聖母之位。在昔依撒依亞預言曰：將來天主聖室之山，其頂超越他山，故衆民齊來敬仰。聖額我畧等解曰：此山，卽聖母。聖室，卽聖母之胎。以其懷孕天主聖子，故謂之聖室。超越他山，卽超諸神聖也。且聖母當助聖子救世之工，故天主當賜相稱之聖寵，拔之疇人之中，超諸神聖之上，俾克稱其職。聖老楞佐儒斯

定云、若聖母不滿受聖寵、安能爲上天之梯、普世之轉達、天主與人之中保。蓋聖母既當爲諸聖轉達、較之他聖、自宜更爲天主所寵。則其所受之聖寵、亦宜多於他聖。洵如是、聖母聖誕、眞爲吾人可喜可慶之日。吾當稱頌聖母、感謝主恩、曰、仁慈天主、賜吾特寵之大恩。既聖母之產、爲吾等蒙眞福之慶。聖母聖誕瞻禮、托賴保護神形潔淨、幸致和平之益。爲吾主耶穌偕罷德肋偕斯彼利多三多、乃生乃王。亞孟。

三、聖母如何報答主寵。○聖母在母胎時、卽能用靈魂三司、

故卽能報主聖寵，明認天主無限仁慈，及救人之意。并知己受天主特恩，生無原罪。於是感戴之情，勃發不止，全心全靈，熱愛主善，一無他念，卽其覺司，因無原罪之累，不得擾亂，故聖寵日增，而愛主之心日熾。若葡萄繫樹，樹長彼亦長，樹若長之無窮，彼亦隨之而無窮。聖盎博羅削取譬而解之曰：天主樹也。聖母，葡萄也。聖母之隨聖寵，若葡萄之隨樹，彼此俱長。余靈，汝則何如。聖母誕時，比無數天神，萬億聖人，更神更聖。汝不能如此，幸蒙天主天恩，得免前罪，爲何不做效聖母。

時時加工，而仍願犯罪。聖母純謙，汝心純傲，惟想尊高。聖母拯救他人，樂於勞苦。汝爲救己，不願受些苦難，常思快樂。如此度生，得與聖母相似否。

四日聖母獻堂

一、聖母速獻主堂。○聖母始孕母胎，卽明達主旨，獻已於主。天神現於聖婦，俾利日大云：我后始胎，速以愛欲，全獻於主，直至終時，毫無間斷。而其愛欲之熱切，如何願行愜主之事，更非世人所能悟。適三歲時，知雙親已獻已於天主，渠即堅定志向，自願獻於聖殿。爰求雙親領其前往，踐行前願。其父若亞敬及母氏亞納，雖甚愛其女，不忍棄離。然爲主之故，親抱至日路撒稜，如願獻主。聖額我略云：當時有許多天神，同

行侍衛，大相驚異。若曰：騰輝如嚮晨，娟娟如月，焯焯如日，威嚴整肅如蒞軍者。斯女爲誰？天神互相告曰：天主聖母，如美蓓臘，郁然甘芬，莊淑嫺麗，而怡然備於衆樂。於是同唱曰：吁，吾主之母，爾之行踪，若何愜主聖心。聖伯納定曰：此日天主舉行大禮，因見已淨配，受造中最愜己心者，奉獻於己。聖日爾孟曰：吁，普世元后，天主聖母，去，怡然登殿，俟聖神選爾爲聖子之母。聖母甫至聖堂，回向二親，跪彼膝下，懇求降福。口親厥手，以申愛慕之情。旣而若向諸在堂女子曰：日路撒梭

女子，予雖黜，然甚都。王愛予，進予於宮禁。天主聖父大聲示之曰：我女，聽之，視之，側爾耳，忘爾民，并忘爾父之家。王將羨爾端雅。於是聖母挺身前行，絕不後顧。於高階十五級，自升而上。至大司牧前，獻己身靈。以後不顧其他，惟思悅樂主心。正如洪水後，諸厄所放之鴿，速回舟中，不若黑鳥樂屍不反。世有多人，受主聖召，常眷戀世物，不卽順從。正如黑鳥然。余靈，爾亦如是否。爾自生至今，曾獻爾於大主否。旣獻天主後，嘗回視世俗之逸樂，如餓犬仍吞所吐之物否。倘爾如是，速

改前非，效法聖母，毅然速獻。蓋彼操修日進，速至修成。如明月週行其道，速於他星。

二、聖母全獻天主。○聖母領受默牖，知天主不樂貳心。經曰：爾宜全心愛主。聖母一聞此言，卽定志全獻於主。於是入堂謝主無限仁慈，獻己靈魂三司，肉身五官。奉獻明悟，願明天主奧理。奉獻記念，願想天主經言。奉獻愛欲，願常熱愛於天主。獻厥目，不觀非禮之物。獻厥耳，不聽非禮之言。獻厥口，不出非禮之聲。獻厥心，不動非禮之念。獻厥手足，不行非禮之

事統獻一身，願用恭敬天主。而天主之外，無他想，無他望，無他愛。卽向天主曰：我主，我天主。我來爲憫爾聖心，爲顯爾光榮。予願生則爲爾，死亦爲爾。請爾納我自專之柄，收我記明愛欲，三司。凡我所有，皆爾恩賜。我今悉數繳還，憑爾聖意統御。惟望爾助我忠信，使我誠心獻爾。余靈，爾嘗全獻於主乎。問爾所明者何理，所想者何事，所愛者何物。天主乎，抑世樂與世福乎。噫，謬矣。五官所享之虛樂，不爲主克除之。四體偶然之艱難，不爲主樂受之。無論於理能有之喜慶，未嘗獻之。

天主，卽不合正理之歡娛，亦未速行斷絕。無論意外憑空之冤枉屈情，不肯爲主樂受，卽本來該有之煩難辛苦，俱未順受安心。如是，可謂倣效聖母乎。聖母全全獻主，雖有千百之身，亦將盡獻無遺。爾惟一人之身，分於世物，分於己私。所獻於天主者，不過世物己私所留下之一分。噫，爾於天主，何其吝耶。

五日聖母在堂

一、聖母事主。○聖母在堂，全心敬主。聖安色爾莫曰：聖母求天主，誦聖書，嚴齋，立德，以度日。聖熱羅尼莫更詳論之，曰：聖母在堂，自晨興至九點鐘，默禱無間。自九點鐘至十二點鐘，習行手工。繼而復行默禱，直至餐飯時。總之，於守誠爲最敏，於謙德爲最深，於諸德爲最全。聽其言，甘飴至極。觀其色，忿怒不形。心無他向，惟向天主。聖母現於聖女依撒伯爾曰：余父母留我於堂，子卽以主爲父。所思者，惟恆主。所守者，惟誠。

命。然於誠命中，予所最關心者，卽愛主之誠。故時惟夜半，赴主臺前，祈主賜我謹守誠命，使我親見救世之母。求主保存我目以觀之，我舌以頌之，我之手足以服事之，我之膝蓋以朝拜胎中聖子。聖女聞言，驚問曰：我后，爾非滿被聖寵，及諸德者乎。聖母答曰：爾宜知之。我之視我，最爲卑賤，無功以領主寵，故求主仁慈，憫憐賜我。爾思我無勞而得主寵，及修諸德乎。爾宜知之。予之聖寵，皆由常禱，迫願，流淚，苦工而來。余靈，爾欲得主寵，欲修諸德，不得不效法聖母祈禱，默想，克己。

補贖。日與天主往來。天主之外。別無他求。爾或效法聖母。曾獻已於天主。當如聖母盡已本分。誦經默想。看書之外。又當爲主勤行手工。飲食時。一心向慕天主。五官三司。皆爲天主光榮。無人爲父。以天主爲父。無人爲母。以天主爲母。無人爲爾兄弟姊妹。以天主爲爾兄弟姊妹。總之。天主爲爾諸有。爾或未曾如聖母獻已於天主。當竭爾心力。愛慕天主。奉事天主。稍能倣效聖母在堂所立之德。蓋聖母在堂。功德日進。甚愜主心。聖騷弗老溺曰。聖母爲天主快樂之園。在斯園中。能

得各種美花，卽諸德之馨香，足使天主惠然下降。余靈爾欲天主降爾心中，修厥德焉可也。

二、聖母待人。○聖母在堂，待人甚厚。視長上如天主，視同輩如天神。不敢妄想妄言，少傷愛人之德。女中懿行可仰者，師事之。性情暴厲者，婉導之。逢人之辱，甘心忍受，終不計較圖報。且爲彼求主，賜之翻然痛改。有病者，往顧之，安慰之，百計以助之。神靈失寧者，或虔祈天主，賜其平安。或善言勸導，使之忍受，不致失望。愚蠢者，訓誨之。冷淡者，以已熱愛之心，薰

炙之總之與人交接莫不中矩中規可欽可愛惡言不出於口忿怒不形於色俾在堂諸人中心悅而誠服聖母在堂如是待人爾曾何如願居人上視人皆下見人微過或心幸之或口談之受人微辱或怨報之或厲言斥之或怒色待之己之所行皆長人之所爲皆短與己相善者近之稍逆者遠之病者委棄之貧者輕賤之愚者慢忽之冷淡與靈魂失寧者不爲之求主灼熱之而安慰之種種愛人之端毫不關心乃曰爾爲爾我爲我不妬人不恨人亦已足矣愛何爲哉

三、聖母治己。○聖母在堂，待己甚嚴，持躬甚密，凡諸嬉笑穢態，莫不屏絕，不輕視，不輕聽，不輕言，不輕動。除登堂拜主而外，常居私室，潛自捫心，嚴察其言，其念，并其動靜，合宜與否。默思天上妙事，洞澈聖教奧理，加勉勤修，優造聖域。其見諸外，多聞寡言，謙己尊衆，長者有命，雖苦不辭，採取善言，踐行善行。衣素弗文，食粗弗飽，言遜弗傲，動履端莊而不急促，容貌溫和不無煩憂。或洗掃庭內，或執事堂中，或勤事女紅，以供祭祀。或恭玩經典，以益神靈。總之，起居表裏，隨時無

不盡分合宜，而天主特加寵愛，屢遣天神臨格，密爲啓牖。倍其功德，日益精純。由是同修女伴，趨步恐後。然德愈盛，心愈虛，更求精進，未敢少息。譬彼川潦，集之益盈，就下益速。此乃聖母在堂時，治己之大畧。吾儕宜則而效之。然至於今，好食好用，衣欲文彩，食欲鮮肥。毀言不禁，妄言不忌。狎笑躁情，更無可問。凡一切偏規越矩之端，貪逸偷安之弊，不可明言。三司不守，五官不防。爾之治己，與聖母之治己，真不啻天懸地隔。余靈審之哉。

六日聖母領報

一、天神來報。○聖子降生之期既至，天主聖三卽遣上品天神嘉俾厄爾來報。此時瑪利亞正在房中祈禱，哀求天主，憐憫世人，速其降生之期，併賜已能親見主母，欽敬而服事之。蓋聖母居家，非神工，卽手業，非不得已，從未出門。明知縱耳目之欲，易累罪惡，動主義怒。古聖亞各伯有女名弟納者，偶爾出視外邦女子，卽被人強暴。後兄弟十人報仇，剿滅其國。此事載於聖經，聖母知之甚悉。故雖寵恩滿被，從無罪隙可

入。然仍謹小慎微，不敢稍有疎忽。余靈聖母志堅於鋼，潔白於雪，尙恐磷緇玷污。爾本性柔弱不堪，而敢妄視妄聽，以爲無關緊要，何哉？天神入房，啓口讚頌曰：亞物滿被聖寵者，主與爾偕焉。聖母聞之，不勝驚異，默思來由。天神復告曰：瑪利亞勿驚，幸獲天主聖寵，適將懷孕生子。立名時，稱之曰耶穌。厥位大位，厥稱至高者之子。天主將賜以達味厥父御座，永王亞各伯家。厥國永永無疆，云云。汝思天主極大尊威，而選一貧女爲母，其故非他，以聖母之德，獨超神聖，而天主惟德

爲愛也。嗚呼、聖母之靈、眞如美麗花園、其中名花香草、不計其數。故此令聞遠布、直達九霄。榮福之王、亦親來賞識、賞識之後、見其富有若是、不忍捨去。若向從者天神曰、曷不築宮於此、而久享其馨香。於是隱主性、取人性、見懷九月、不離聖母。噫、余靈、爾知德美若是、尙不介意、尙不奮力以立之耶。抑知汝離軀體時、能偕之同往者、惟此德也乎。速醒之、母後悔。二、聖母允許。○聖母聞天神之報、不敢輕許、因已矢願貞修、定志終身固守。故向天神曰、余不識男、此事曷成。若曰、使天

主母位，不能與貞潔並有，則乞爾轉達於主，准我永守貞潔，寧辭主母之位。天神乃慰之，諭之以天主全能，必將蔭護，爲主母而不損童貞。奇哉，聖母之愛潔德矣。當時如德亞婦女，皆冀獲主母之位，故望子殷勤，以不嫁胎荒爲羞辱。獨聖母爲保守此德，卽天主母位，亦不能稍動其心。欲其允許，必須先許不損童貞。余靈汝之愛潔何若。爲片時穢樂，半點虛榮，擲此珍寶，輕於泥沙。癡狂若是，芳型不遠，效法之可。聖母旣聞天神許其永保童貞，卽順聽主命，向天神曰：主之婢女在

茲希維致成於我，如爾之言。聽其言，觀其行，卽知聖母之謙德，無以尙之。天神名之以滿被聖寵，稱之爲主母，報之以聖子降孕之事，而聖母仍稱己爲婢女。謙德根心，不忘己之有所能，皆從天主恩寵而來。故天神愈讚，聖母愈謙，非如世俗之人，以謙言爲習套，爲沽譽之法。聖母言符於心，先根謙德，然後出謙遜之言。余靈爾習有要譽之病否？若有，卽定心改之。以後凡有譽言加爾，必須靜默，想爾卑賤罪穢，不堪稱道。又凡出謙遜之言，先有謙遜之心，然後可。

三、聖子受孕。○聖母甫允，頃刻間，聖神以聖母淨血，成聖子之胎，而聖子卽降孕。從此瑪利亞登天主母皇高位，尊貴無比。聖安色爾莫曰：國王之位居首，國母之位居次，故聖母之妙，總神聖萬物之妙，比較聖母，皆爲無妙。聖奧斯定曰：天主聖母之稱，心不測，舌不解，獨天主在聖母之上。其餘萬有，皆在聖母之下。余靈爾在聖母臺前，見其尊貴若此，當歡欣恭賀，竭力稱揚。以孝子之心爲爾心，以孝子所奉於慈母者，爾其爲之。至論聖母，當時所有之衷情，尤難測其萬一。此時聖

母熱衷更熾。若向聖子曰：誰使吾獲爾於外，而口親爾乎。此時謙遜之心，勃發不止。向吾主曰：余何人斯，而煩真主降臨。總之，歡樂、感謝、讚美諸衷情，莫不加增萬倍。噫，聖母之福，誰不願得，誰不願聖子降己心中，爲己恩主。然抑知聖母所受之恩，余亦受之。蓋昔日之耶穌，與今日之耶穌，絲毫無異。昔日受孕，今日見食見飲，其恩差大。余靈，倘爾領主前善備，領後善謝，當沾何等恩澤。惜爾冷淡習久，故領主無效耳。已往者，痛悔以補。未來者，熱心以待。奮之哉，尙可爲也。

七日聖母往見

一、聖母起程。○聖母聞天神之言，知表姊受孕六月，且滿受聖神，知聖子將發聖寵之庫，速卽趨行往見。卽此一節，已足爲默想之資。一、吾主欲加聖寵於若翰，必須聖母親往施之，卽知聖母爲聖寵之頸。蓋聖人有言，耶穌爲聖寵之首，聖母爲聖寵之頸，信友爲領受聖寵之肢。物至肢體，必自頸而下，信友領吾主聖寵，亦必自聖母而來。聖伯爾納多曰：天主以諸聖寵，置瑪利亞手，俾我知所有之聖寵，皆由其轉達而至。

賢士利加爾道聖老楞曰。天主造日。以光照普世。亦造聖母。使以轉禱之寵。加諸世人。我若欲得聖寵。必該求聖母。因天主欲賜我聖寵與否。悉隨聖母之意。余靈爾既知聖寵。爲爾若何緊要。亦當知聖寵。如何求得。汝既知聖寵。必因聖母而至。爲何仍漠然於心。不向聖母祈求耶。二。聖母聞言。速卽起行。汝思聖母行主聖旨。如何勤健。况聖母此時。尙未滿十五歲。年輕力弱。不顧路途遙遠。不肯苟安延宕。其故何哉。以其明知一逆主命。能斷聖寵之路。一順主旨。能開聖寵之源。使

之常流不竭。故其惕心驚畏，不敢稍有懈怠耳。爾何人斯，竟不以主命爲急耶。三、聖母起程。一路動靜端方，儀容婉雅，見者莫不驚訝，動其保潔成聖之心。時而誦經讚主，時而恭默思道，以其身懷活主，而心不外馳也。余靈汝欲知爾之閒言浪語，妄視妄聽，從何而來。因心無天主，無眞樂之緣，故求僞樂，以恣爾心。爾若欲去其病，須先斷其根。不然，徒勞無益。二、聖母見表姊。○聖母旣至匝加利亞室，卽拜依撒伯爾。聖人解之曰：聖母何故先啟口，拜賀依撒伯爾。因其謙卑自下，

故雖尊爲主母，亦不待人先已拜賀。噫，爾亦知往來之際，遜讓爲最要。往往一言一問，能變仇爲友，而萬恨悉除。爾何吝惜一言，致失如是之效乎？況他人或非尊長，即是同輩，理當先言拜問。卽或路遇小輩，亦宜如此。聖母嘗先言問候，曷不則效之？依撒伯爾聆聖母拜賀之言，覺胎嬰喜悅踴躍。時聖神充滿其靈，大聲向聖母曰：女中爾爲讚美，爾胎子並爲讚美。聖母聞言，毫不動心。蓋以譽言如蛀，敗功喪德，俾功德變成無有。汝知譽言之虛空，而仍百計圖之，何哉？聖母不特輕

視美譽、且以所受美譽、全歸天主。故一聞譽言、卽讚主曰、我靈感頌吾主、吾神無任忻愉於救我者云云。因聖母深知天主爲萬善之源。凡諸美善、皆宜歸於天主、而光榮爲尤甚。經云、予不給人光榮。貪美譽者、卽盜天主之光榮。聖母心合主旨、故其光榮天主之願、實不能自己。余靈、爾遇人之讚譽、嘗如聖母盡歸天主乎。不歸之天主、天主將不予爾永遠之光榮、而罰爾受永遠之恥辱、爾其戒之。

三、聖母居表姊家。○聖母居表姊家、約三月、服事聖婦之外、

立表勸人，動其觀感，默想所懷之聖子，時時降福聖婦之室。汝思依撒伯爾之家，如何忻幸。昔者結約之匱，在奧勃奪之家，天主降之遐福，財貨日增。達味聞之，不覺翻然曰：余將前往，取其匱及其福，入之于家。夫聖母所懷之聖子，與古教結約之匱，尊卑大相懸殊。則聖婦之家，當受何等洪恩，何等福寵，豈筆舌所能盡述。余靈，汝欲受諸恩寵，當常侍聖母之側，而求之。蓋彼胎懷聖子，包藏聖寵之源，給之不乏，施之不窮，

惟當自取之也。

八日聖母聖產

一、聖母待產吾主。○聖母胎懷聖子，產期將近，欲見之心，不覺日熾，服事之願，不覺日增。於是取聖曲之言，再三向聖子曰：誰使我獲爾於外，而口親爾耶？又因其救人之願，勃發於心，明知聖子降生，不特爲一己之益，實爲救贖衆人。故祈聖子速降人世，俾救人之工，與其救人之願，及早成就。爰以先知諸聖之言，常向聖子曰：諸天，請爾雨露，彩雲雨降義人，請大地啟關，發生救世者。或將達味聖王之言曰：主，請爾顯示

爾能速來救子。又曰，義德之日，請爾速見。凡居幽暗死亡之影者，得爾光照，得爾灼熱，俾獲爾寵恩。聖母若是熱心祈禱，愈增厥德，愈修厥靈，如設席宴王者然。清宮除道，結綵張燈，惟恐不及。余靈領聖體時，爾懷吾主，一若聖母之懷聖子，其恩浩大，即天神亦若爲之妬忌，而驚異不止者也。問爾領主前，嘗如聖母善備乎。爾心何在，爾情何若，爾自省之。恐爾心馳外務，情冷於冰，不特當有之德，無一見存，即當除之罪，亦未盡除。如是領主聖體，恐救爾之天主，將爲判爾之天主矣。

戒之哉。已往之失，不可挽回，惟有真心悔恨。將來之事，在爾權下，爾宜慎之。爾宜悔爾愆，滌爾罪，以淨爾心。如農夫之布嘉種，蔓草盡除，爾宜增厥功，修厥德，以飾爾靈。如聖殿之行大禮，儀容備至。爾若如是預備，主將謂爾曰：慈善爾王，子來視汝，并永與爾偕。

二、聖母產生吾主。○羅瑪總王，欲知民數，令民各於所屬本府，報冊送京。聖母爲達味之裔，故同若瑟前往白稜。聖母在路中，備嘗諸苦，難以盡述。觀彼一路之言行，莫不端莊肅雅。

其心結合天主，其口常論主事，或誦經，或靜默，無閒談，無嬉語，目不妄視，耳不妄聽，全心全靈，俱向將產之主。至城乏寓，不得已，投宿馬棧。產期已至，熱愛非常，即於默禱中，產厥首子。聖母見聖子已誕，俯身拜爲眞天主，以襁褓裹之。余靈，爾宜投入聖母心中，學習當時所有之情。爾思聖母神樂如何，愛慕如何，如何感謝天主，如何謙遜自己，并以身靈及身靈諸有，全獻吾主。再以耶穌聖嬰，取入懷中，捧抱之，乳飲之。而

其所有之衷情，皆從聖神默牖而來。則其衷情之高妙，何如不難知矣。此時聖母見聖子臥於馬槽，襁衣裹體，被大風，被冷凍，不覺憂悶至極。正如利刃刺心。然亦安然忍受，以己及聖子之苦，盡獻於天主。余靈爾既目覩其行，耳聞其語，須牢記於心，施之於行事，而後可。聖母默禱時，產厥聖子。爾宜默思吾主之愛，領主聖體，以動爾愛主之情。如聖母以熱愛之心，懷抱之，欽拜之，感謝之，而忻愉之也。或發謙遜之情，向主曰：「我有何德，而煩吾主顧我。或獻己身靈，及諸所有，以順吾

主之心。乃曰。凡我所有。皆爾恩賜。我今悉數繳還。憑爾聖意統御。又發信。望。愛。諸德。如聖母以襁褓裹之。噫。爾若如此善領聖體。必蒙吾主憐視降福無疑。今同聖母瑪利亞向主曰。至尊至弱之天主。可欽可愛之聖嬰。爾爲我愈賤。我愈愛爾。爾愈受人之輕藐。則愈足受我之愛情。爾愈卑。使我愈高。又向聖母曰。可敬可愛主母瑪利亞。爾產聖子。爲救吾人。賜我得脫地獄之苦。永享天堂之福。我願讚頌爾。感謝爾。并爾聖

九日聖母取潔

一、聖母取潔。○古教有取潔之令。凡婦受孕生子，其身若污，禁入聖殿，生男待四旬，生女待八旬。限期既滿，親至聖殿，奉獻禮物。司祭者代祈，以後得入聖殿。聖母瑪利亞至貞至潔，不由人道，只因聖神之工，誕生救世耶穌。產前、產時、產後，無損童貞。正如玻璃受日之照，光透玻璃，毫無損壞。又如梅瑟所見之叢棘，焚而不燬，實不必行取潔之禮。然聖母立表訓人，無時或間。故不畏路途遙遠，興程至京，自儕於罪人之列。

恭行其禮。一、示我順命之德。追憶耶穌立名時，宛若罪人行割損之禮，今聖母亦然。可知真正榮耀，真實光輝，全在合天主聖意。世上多人，假取尊榮，欺人耳目，徒增罪戾，並非聖母之表。余靈爾欲效聖母，當以順聽主命，爲爾極尊極大之光榮。將世上虛假尊榮，爲愛主而悉除。二、示我當速求潔淨，不容少緩。凡鹿之性，或食毒味，或受重傷，速覓藥草，醫傷吐毒。罪人犯罪，不啻受傷啖毒，而竟不知速覓痛告之藥，痛以醫傷，可乎。聖納西盎嘆曰：醜哉爾怠，有聚財之機，爾

以殺吾靈，皆靈性之盜賊，搶掠吾靈之德，皆靈性之門牖，引吾靈出遊於外，專念世俗之物，而忘已忘主。余靈戒之哉。二、耶穌獻堂。○如德亞國人，旅居日多，國有年，艱難日甚，天主憐之，命回祖宗本地。未出境，惡王多方禁止，天主盡殺通國長子以救。乃命如德亞國人，自此以後，各獻長子以記往恩。聖母既因聖神受孕，不由人道而生聖子，自宜不入此律，不必獻已聖子。然聖母謹小慎微，不特應守之誠，守之無遺。即不必守之誠，又守之甚嚴，以作萬世順命之表。故定期既

三、即奉晏至京，在聖臺前恭行獻禮。於是向主聖父若曰：我父，以主性而論，耶穌基利斯督，洵爲爾子。以人性而論，亦爲我子。我知此必慼爾聖心，故全獻於爾臺前，感謝爾恩，稱揚爾德，請爾納此全燔之祭。主，我獻此子，爲救世之犧牲。求爾因此獻儀，赦免普世背爾之愆。此時聖父見獻者之熱心，獻儀之珍貴，即欣然樂受，并祝遐福於普世。余靈，汝知聖母獻厥聖子，特爲救贖爾。爾宜如何欣喜，如何感謝。爾欲知聖母獻厥聖子，如何心傷。當知聖子如何可愛，而聖母愛厥聖子。

如何熱切。蓋聖子非他，乃萬王之王，萬主之主，無窮可愛者也。況聖母惟有一子，故其愛之遠勝己靈，及諸所有。今乃爲吾罪人，親獻此無玷羔羊，聖母之心，能弗痛甚。正如西默盎所云，爲利刃所刺。聖安色爾莫嘆曰，仁慈聖母，若天主全能不扶助爾，必不能受如是劇苦而不死也。聖伯爾納多曰，此時聖母雖生若死，所受之痛，較死更烈。余靈，聖母爲爾獻厥聖子，受如是痛苦，爾宜如何報謝。宜獻爾全身於聖母，求聖母轉獻於聖父臺前，則爾常生之路，可穩走無虞。

十日聖母升天

一、榮召升天。○聖母約至六十三歲，願見聖子之心，與日俱增。天主即命天神，來報升天之期。定期一至，聖母一味愛慕天主，靈魂脫離肉軀，上升天國。夫聖母之死，超越尋常，與凡人大異。蓋凡人心戀世物，罪戾昏神，而升天之望，無有確實，是以輾轉難安，貪生畏死。聖母不然，既不爲世物牽連，又不爲罪過擾亂，且明知升天之不爽，故不特毫無憂懼，并快樂至極。因其三歲時，獻於主堂，離棄親戚，一生窮困，勞苦度生。

一切俗務世情，逆諸度外，毫不關心。聖母嘗告聖女依撒伯爾曰：子之雙親，獻我於主堂，予即定心愛主，以天主爲予父，爲諸富有。經記聖若望：聖母披日踏月。聖人解之曰：月者，更變之物，貨財之像，聖母輕賤之，踏之足下。況聖母始孕無玷，一生惟積德累功，無纖塵之沾染。故死候所有者，惟功德，惟愛慕及依賴天主之情。一切忍耐，謙遜，仁慈，愛人，順命，及諸功德，環繞臥榻。安慰之，而給以升天之券。余靈，汝欲得升天之券，而臨終平安，當如聖母立功修德，不爲物欲所蔽，不

爲罪惡所污，而後可。俄而神聖從天下降，恭迎上天。聖母喜不自勝，樂不可當。即以達味聖王之言，向主曰：誰與我以鴿翼，飛至主前，而得安息。又曰：天主，子慕爾，如麋鹿希於泉。子靈渴，惟勇惟活天主，何時至，見天主臺前。於是馨香滿室，天神奏樂，明光四射。耶穌親自下降，若向聖母曰：可愛之母，美潔之鴿，起，離此涕泣之谷。來，爾靈爾軀，受爾善生之報。爾自生至今，備嘗辛苦，今將受其報矣。來，坐子側，子將冠爾，立爾爲普世元后。聖母仰見聖子，且聆聖子之言，滿心喜悅，熱愛

之情不能自禁。即速入聖子之懷，如矢向正鵠然，上徹雲霄，直至天門。天神扈從，羣聲讚頌曰：童貞瑪利亞升天榻，其上衆王之王，坐於星宿座，遍地宜踴躍，而歡慶奉事主。諸在外之天神，向在內者曰：鉅公，擎爾諸門，且諸永門啟，而榮福之后將進。天神即大啟天門，恭迎入內，諸神聖次第拜賀。聖三稱揚，加以榮福冕旒，定爲萬世元后，衆人主保。余靈瑪利亞升天，天神欣樂，合一讚美主。爾何不頌揚天主，慶賀聖母曰：聖物，諸天母皇兮，聖物，天神元后兮，中爾福，照世之光兮，自

爾出之根本兮，榮福童女歡樂兮，爾純美超越於衆兮，慶爾聖德極隆兮，伏祈轉達基利斯督吾等主。聖童貞，屑受予讚美，賜予攻爾敵仇之能。

二、天上光榮。○聖保祿宗徒書曰：天主預備之報，以報愛其之人者，耳所未聞，目所未見，心所未忖。聖伯爾納多曰：天主爲他聖，已備若是光榮。爲己可愛之母，將何如。將必擢之，超諸神聖之上，其上惟有聖子。聖安多尼諾云：主母與僕役，尊卑大相懸殊。聖母在天之光榮，與神聖之光榮，更無可比。聖

巴西畧曰、聖人之光榮、較之聖母之光榮、若小星之比曉日、不可幾及。聖伯多祿達彌盎曰、星月之光、見日即隱、宛若無有。聖母在天、亦然。神聖之光榮、見聖母之光榮、幾乎滅跡。聖伯爾納多有言、聖母在天、所有榮福之量、一如在世所受聖寵之量、與所立功德之量。聖母既滿被聖寵、功德全備、而爲神聖之后、則其所受之光榮、自宜超諸神聖之上。噫、瑪利亞得如是尊榮高位、吾儕當如何喜樂。彼雖不在世間、然其愛吾之心、實無減。且在王右、愈識吾儕之困乏、而愈欲憐憫。

吾佑助吾聖達彌盎嘆曰吁童貞聖母因爾受此極大光榮必不忘吾儕之卑賤然欲得聖母護佑必須奉事敬愛盡心虔禱屢向聖母曰仁慈之母天地之后請爾飽飫吾以爾聖子之光榮賜吾得嘗爾餘下之樂爾如主母與主同宴吾儕如小犬在爾臺下望爾憐視亞孟。

十一日聖母謙德

一、謙德之要。○靈魂無謙德，諸德全無。即有諸德，而失謙德，諸德終將盡失。無他，以謙爲諸德之基耳。聖方濟各撒肋爵致書於聖婦鄉大爾曰：天主最愛謙德，不拘何地，見有謙德者，主即赴之。即此一言，已可知謙德爲最美善，最緊要矣。奈世人驕傲性成，不識謙德之貴，必須天主聖子親身降世，先立表樣，諭人效法之。曰：法子，予乃良善心謙。惟聖母於諸德中，最效吾主，故於謙遜，更爲超越。聖母默示聖女默底達曰：

謙遜，乃吾自幼首習之德。余靈，爾能如聖母做效吾主否。爾曾如聖母習此謙德否。爾不做效聖母，習此謙德，安望諸德全備耶。

二、聖母輕己。○謙德首務，在自輕自賤。余靈，請看聖母何如。聖女默底達承聖母默牖云，聖母常思己之卑賤，雖見己所有聖寵，較人更多，然終不敢一萌勝人之念。聖母如是自輕自賤，非因己爲罪人，因聖母明知從未得罪天主，亦非不知己所受主寵，超越諸受造者。實因想主所賜之恩，正致其更

謙耳。蓋默想天主美善，無窮廣大之外，又思己之卑賤，及本性懦弱，自然謙遜之心，不能自己。如乞丐然，著人所賜之美服，在恩人前，非特不形其驕態，且更露其謙卑。因想他人之恩惠，即承認己之困窮。聖母亦如是。愈見所有之聖寵，則愈覺天主之大恩，因而謙遜之心，有增無減。聖母親示本篤會修女聖依撒伯爾曰：須知我自視最爲卑賤，不應受天主聖寵。爲此聖伯納定曰：受造中，無一如聖母之高超，因無一如聖母之謙遜。余爾爾居人上，不肯自卑自下，竟忘汝柔弱。

忘汝罪過，忘汝所有之微善，皆爲天主恩施，可謂效法聖母謙德之人乎。

三、聖母隱善。○謙德次務，在隱藏所受之恩。若瑟嘗不解聖母受孕之緣由。此時聖母似宜親示之，以釋淨夫之疑惑，及一己之羞辱，而聖母仍默不一言。凡聆讚美之語，辭而不受，全歸天主。故聽嘉俾額爾讚美之語，渠卽驚慌。經云：渠聞驚異。聽聖婦依撒伯爾之讚，卽以此歸於天主。乃曰：予靈丕顯主兮。若曰：依撒伯爾，爾讚我，我讚主。因諸讚美，應歸於主。爾

訝子遠來視汝，而我訝主無窮美善，我神無任忻愉於救我者。爾讚我信主之言，我讚主緣其垂顧婢子之微。聖母啟牖聖婦俾利日大云，我若不思，本無所有，安能自謙乃爾，而得如是主寵，故我不願人讚，惟願讚我恩主，造我之大主。聖奧斯定默思聖母謙德，嘆曰：福哉謙也。爲人產主，開天門，救靈自冥獄中。余靈爾曾如是否？爾有些微之善，卽顯示人前，俾見而稱汝善。聆人讚汝之言，即滿面歡顏，喜出意外，竟不歸

於人。爾可謂效法聖母之人乎。

四聖母愛辱。○謙德三務，在愛慕侮辱。經記聖枝禮日，耶穌榮入京都，聖母不與焉。吾主受難之日，聖母侍立架旁，不離加爾瓦畧山，甘心忍受侮辱之言，被惡人稱爲犯人之母。我靈，聖母如此受辱，爾還願避辱趨榮乎？聖母嘗謂俾利日大云，諸侮辱中，最可醜者，莫如癡人之稱。我女，我之稱謂，果若此也。我靈，爾能受如是之慢言侮辱乎？可敬修女保辣化利，嫻越禱時，明認聖母謙遜之廣大。卽於神師前，述己所受之恩，連聲讚嘆曰，聖母之謙，聖母之謙，世上無一可比聖母之

謙。一日，聖婦俾利日大神目見二女，其一輕浮誇張，吾主謂之曰：此即驕傲。其一低首下視，只思服役於人，一味敬畏天主，視己如無有。吾主亦謂之曰：此即謙遜。此即聖母瑪利亞。我靈二人中，何者爾欲則效？效輕浮誇張者乎？此非聖母。倘爾欲效聖母，惟謙始可。且爾若不謙，不得爲聖母眞實子，并不得中聖母意。爾宜師法耶穌，會司鐸瑪爾定亞爾備爾篤，渠爲愛慕聖母，日習洒掃，除去污物。聖母顯謂之曰：此謙遜之聖母，爲愛我而行者，甚愜我心。余靈爾宜向聖母曰：吾母，我

若不自謙，不能爲爾眞子。然爾知我罪之故，不特負主大恩，且驕傲至極。吾母，因爾謙遜之功，療治我，賜我謙遜，得爲爾子。亞孟。

十二日聖母信德

一、信德之要。○信德爲救靈之根本，缺此信德，不能升天。故不拘何人，在世度生，分當信主，及主默牖之道。蓋天主全能、全智、全善、尊威無窮，非吾儕些小明悟，能測其萬一。故欲認識天主，稱其尊威之廣大，非天主親自默牖，而吾儕誠信之，不爲功。於是信德之用，最爲緊要，而不可或缺。外教者反是，以能見能聞者爲有，不見不聞者爲無。故凡聖教會所諭超性之理，皆悖逆弗從。余竊爾與外教輩，時常往來，恐未免稍

有沾染。以後當堅心定志，不爲搖撼。更當奮爾精神，效法聖母之信德。況吾儕受造於天主，爲得常生，必該信吾主耶穌。及吾儕超性救靈之法。然無超性之信，不能信超性之法。不能信超性之法，卽不能行超性之路。不行超性之路，安能至超性之本鄉。而在天享福耶。至論聖母，爲天主光榮，最爲關心。得天堂之福樂，最爲廣大。以理而推，已可知聖母之信德，大無可比，眞而無假。余靈爾欲升天享福，必須行超性之路，卽根信德而行。

二、聖母誠信。○聖母爲信德之母。聖依肋納云、聖母囚己信德、補厄伐不信之害。厄伐不聽主命、而信蛇誘。聖母信天神之言、爲天主母、而不失童貞。聖奧斯定曰、聖母許主降孕胎中、因厥信而開天門。又曰、聖母懷吾主耶穌之信、比懷吾主聖身、更爲有福。耶穌會博學士蘇亞類斯曰、聖母一己之信德、超諸神人之信德。當在白稜時、見聖子臥於馬槽、而信其爲造物主。見其被黑落得之害、而信其爲萬王之王。見其暫生、而信其永活。見其困窮窘迫、而信其爲普世之主。見其寂

苦而信其全能、見其靜默、而信其全智、聞其號泣、而信其爲天堂之欣樂、見其受人侮慢、被人釘死、此時衆人之信、皆爲搖撼、而聖母毅然不屈、仍堅信爲眞天主、故亞爾備爾篤大博學士云、聖母有過人之信、聖梅刀奪稱其爲信友之光明、聖濟利祿稱其爲信德之皇后、聖教會稱其爲拔除異端之根者、余靈爾知聖母之信德、如是高大、尙不讚美而則效、是誠何心。

三、效法聖母誠心。○吾儕欲效聖母信德、當知信德一爲恩

惠一爲德行。天主賜我靈魂之光明，是爲恩惠。隨此光明而行，是爲德行。聖額我略曰：信而卽行，斯爲眞信。行其所信，斯爲實行。聖奧斯定曰：爾曰：我信，行爾所言，斯卽信矣。人若不踐所信而生，是人之信，爲死信。聖雅各伯云：信無實行，死信也。古名士第阿才南，青天白日，手携燈燭，在萬人中尋人。天主於今亦然，在信友中尋信友。因在信友中，有多信友，不隨其所信而行，是名爲信友，而實非信友，故天主尋覓之，欲得眞信友也。總王亞立山時，行伍中，有一懦卒，亞立山謂之曰：

爾有勇之名、而無勇之實。今而後、或改爾名、或改爾行。虛信者、急宜以此猛省。名師亞未辣云、如此之人、當視之如癡、而置諸獄中。蓋彼雖信、善生得福、惡生得禍、而視彼度生、若不信者然。余靈、今汝信德何如、行此信德又何如。真信乎、抑假信乎。有行之信乎、抑無行之信乎。汝之行事、果與信德相符乎。曷不思聖女德肋撒之言曰、世無信德、故犯多罪。汝之罪、恐亦由是來也。爾宜急求聖母曰、吾母、因爾信德之功、賜我活信。

十三日聖母望德

一、望德之用。○望德者，望主護佑，俾得行善，而得常生。此德當專而誠，堅而不搖。蓋天主全能全善，凡吾儕救靈之要助，無一不能施，無一不欲施。但吾儕劣弱，不克全副主寵，愼厥始，未必克厥終。故於救靈之事，都有畏懼不安之處。抑知望德愈大，畏懼之心愈減，而奴僕之畏，全全脫去，靈魂之安，全全享受，善功富有，行爲清潔。如是，良心泰然，全賴天主仁慈，走常生之路。彼怙終不遷者，反是。其望浮而不實，僞而不真。

妄恃天主仁慈，以改遷爲無關緊要，是以日爲良心所囑，無地可安。余靈孰從孰違，汝其愼之。并願汝思聖母之望德，而敬式之。

二、聖母堅望。○聖母旣爲聖神淨配，全撇世情，視世如曠野。不恃己，不恃物，不恃己功，全賴主寵，日造主愛。是以聖母之望德，洵堅且大。試思聖母懷孕吾主，若瑟懷疑不解。聖母於此，似宜親自解釋。然其欲隱主寵，不願己之光榮，表示人前。并知天主仁慈，必願救護，即以此事付之主手，望主矜全。吾

主誕前，遠赴白稜，欲假館投宿，而郡人不納。聖母默忍心受，不出怨言。全靠主佑，寄寓馬棧。後往避厄日多國，適彼曠野，無衣無褐，無食無銀，雨無遮，風無蔽。當此跋涉之艱，困厄之苦，他人處之，必怨藏於心，怒形於色。或疑天主無能，或想天主不仁。而聖母容色怡然，上不怨主，下不尤人。知全能天主，自有保全之策。及吾主傳教時，加納新婚乏酒，聖母以望德，使吾主變水爲酒。更可奇者，雖此時吾主若辭彼請，而聖母之，仍絲毫不減。謂諸漢曰：主有所言，爾儕卽行。吾主懸架

時人愈不信吾主全能。譏之曰。能救他人。不能救己。爾倘爲
天主子。可下。吾見即信。又有門弟見吾主已死。而不見復活。
即心生疑惑。曰。吾果望彼救贖本國。然今已死三日。而聖母
誠信堅望。知基利斯督須先受苦。後入其上國。余靈。聖母之
望德如是。能不對此而生羞愧。能不對此而深則效。

三、效法聖母堅望。○吾儕專務救靈。當以聖母之望德。爲吾
儕之準則。蓋吾儕劣弱。惟賴主助。可成諸事。是以諸事中。望
主矜全。特於救靈之務。不可失望。然不可失望者。非爲己有

好處、總因吾主耶穌之功勞、無窮無盡。吾主耶穌之十字、能救汝永苦、莫救之靈魂、而享天福。爾還不該專心切望耶。聖奧斯定曰、世俗邪魔、肉身、隨便害我、我不失望。因我之望、不在我、在我主。請問人之倚靠、或有勝於耶穌者乎、無有也。信此倚靠、所望自然不虛、如之何弗望。然而望天主者、毋失望、亦毋妄想。妄想者、即縱情怠惰、無功而望賞、怙惡而望赦。汝既知天主至仁至愛、肯寬肯救、豈不知天主至公至義、能嚴

能罰耶。如之何失望、又如之何妄想。余竊爾宜以聖母爲爾

主保訓爾望德。即向彼曰。吁。至聖母后。聖望之母。教會稱爾
爲吾等之望。我今求爾。因爾望德之功。轉求天主。賜我堅望。
亞孟。

十四日聖母愛主

一、愛主之要。○保祿宗徒書曰，信、望、愛，爲三大德，而愛德尤大。故愛德之量，爲作聖之量，而愛德非他，即爲主而愛主，兼爲主而愛人，則其德之高超緊要，不難省悟矣。保祿云，無愛德，予即爲無，不論何德何功，皆爲空虛無益。若子能言人與天神之言，而無愛德，如鈴響，如鑼鳴，即或能言未來，能知衆妙衆學，即或信能移山，而無眞愛，諸如無有。即使散財濟貧，火燒致命，無愛德，何益之有。余竊爾見愛德如是緊要，還不

該奮發爭先，如學學求利然，滿此缺陷乎？還不欲熱心虔禱，求主賜厥聖愛乎？噫，汝心誠不可問矣。余不知愛德之效，或能動爾心乎？汝其思之。夫愛德能使天主變恨爲愛，能使聖神居爾心中。若聖殿然，爲彼安居之所。甚至爾之生命，爲主之生命。爾之願欲，無非爲主之願欲。余靈曾覺如是之效乎？若爾不覺，不愛故也。聖奧斯定曰：給我一愛者，即覺余所言矣。誠哉此言。苟非熱心愛主，安能知保祿熱愛之言。聖女德肋撒等，爲愛主之故，嘆慕不止曰：或爲忍苦，或爲愛爾而死。

噫，以如此之言，問之俗人，決然不悟。故爾欲知其效，心須愛主，而後可。汝視聖母愛主，自可了然於心。

二、聖母熱愛。○聖安色爾莫云，心愈潔，則愛愈熾。聖伯納定曰，聖母愛子之愛，超諸受造者之愛。故聖方濟各撒肋爵稱聖母爲愛德之后。聖伯爾納多云，愛主之情，通透聖母之靈。利加爾道嘆曰，熾愛者天神之品，能自天下降，至聖母心中，學習愛主之德。蓋聖愛之天主，親降人世，爲爍人愛主之火。而人中受爍者，莫如瑪利亞。彼因不爲世情所侵，故易受火。

之烈炎。噫，聖母聖心，眞如火如炎。因其內心至熱，謂之火。因其外著愛主之熱，謂之炎。噫，聖母愛主之德，巍乎高哉。當時聖母懷抱聖子，正如火抱火矣。聖多默未拉諾意謂：當時梅瑟所見叢棘之火，即聖母聖心之預像。昔聖母顯於愛徒若望，身披太陽，職是故也。聖伯爾納多曰：受造之中，從未能更近義德之太陽，而聖母已近而親炙之。由是魔鬼不敢近厥身而誘惑。聖文都辣讚曰：聖母從未受誘。其故非他，因其聖心至熱，魔鬼不敢就近。視彼火窖，營營青蠅，莫敢嚮邇。聖母

顯示聖婦俾利日大云，我向在世，天主之外，從無他想，從無他願，從無他福。耶穌會博學士蘇亞類斯曰：聖母之靈，常在主前，如鳳凰目常注日。外行不阻其愛，愛亦不阻其外行。更可奇者，聖母夜寢時，亦能愛主。正如聖經所云：子身寐而予心寤。且聖母寐時所有之愛，較他聖醒時所有之愛，更爲熱切。總之，聖母愛主之心，至切至熱，受造中，莫能幾及。聖多默未拉諾曰：聖母熱愛、燥熱主心，俾自天降厥胎中，爲人救世。噫，余靈，聖母愛主，如是熱切，爾果何如。爾夜寢時，不能如聖

母愛主，豈醒時亦不能乎。爾豈不能於將睡時，全獻爾心，并以睡時之一呼一吸，爲天主愈大光榮乎。爾豈不能於偶醒時，倣效聖母，發一愛主之情乎。至今何如，汝察之。以後何如，汝定之。

三、效法聖母熱愛。○聖母旣如是愛主，必願吾人亦竭力愛之。一日，聖母現於聖女安日辣化利嫻曰，爲得吾子降福，當竭力愛之。又現於聖婦俾利日大云，若汝願結予心，須愛吾子。由此觀之，聖母聖心所切願吾人者，惟熱心愛主。然吾人

欲愛天主，當以聖母爲依歸，并親近之，而受其薰炙。聖文都辣曰：聖母全全是火，觸之者卽被焚。余靈爾欲得愛主之熱心，當趨至聖母臺前，以爾禱爾情，常契聖母。如聖方濟各撒肋爵禱曰：愛德之后，至爲可愛，最受主愛，極愛造物之主者，因爾愛主之熱，從無間斷，願賜我一星之火，灼熱我心。吁，我母，我願非他，惟願因爾愛耶穌之愛，俯聽我禱，爲我轉求。亞孟。

十五日聖母愛人

一、愛人之德。○愛主與愛人，合成一誠。聖雅各伯書曰：吾儕有命，愛主者，兼愛昆弟。聖多瑪斯解曰：其故非他，因愛主者，兼愛主所愛者也。聖女加大利納向主曰：爾願我愛人，而我尙未能愛爾。主答曰：愛子者，必愛子所寶。故愛人之量，與愛主之量，相爲增減。但眞愛主者，愛人非爲人，惟爲主。聖保祿云：愛人者，全守誠命。蓋爲主愛人，卽爲愛主。而愛主愛人，非他，全守誠命也。先賢嘗立表矣。有輕財物，輕安逸，且輕生命，

而盡愛人之誠者。推其原，皆從愛主而來。聖母在世時，大徵此道。因其愛主非常，迴超諸受造者，故其愛人之量，常人莫測其高深。當今在天，愛主之量愈增，則愛人之量，更無可測度。今以其愛人之行事思之。

二、聖母愛人。○聖母明知主將降世救人，故始胎時，即偕古聖熱心禱主，使聖子先期降誕，俾人早得降生之恩。此乃聖文都辣及許多聖賢之講論。天主因聖母之祈求，最爲熱切，故特賜允許。既而領天神之報，爲救世人，弗辭主母之任。許

曰主之婢女在茲，希惟致成於我，如爾之言。總之，聖母一生以助人爲務，故不待人求，而早已欣然樂助。如加納一事，新婚者尙未出一語，聖母早爲轉禱。往見聖婦依撒伯爾，爲扶助之故，不怕山川修阻，不辭跋涉艱難。其最顯愛人之心者，在獻己愛子，爲人被釘，死於架上。聖文都辣曰：聖母如此愛世，至付惟一子於世。天神顯示聖婦俾利日大云：未有求聖母，而不得所求之寵。聖伯爾納多嘆曰：聖母，世間惟未識爾慈，未蒙爾惠者，可不讚爾德。意謂：斯世斯人，盡在聖母慈惠

中、或有未識未蒙者、乃陷於邪誘之人。余靈、知乎否乎。聖母愛人如此、尙有何言可言、何名可名乎。且聖母愛人之德、更於愛仇見之。聖母最大之仇、乃殺已愛子之人、如日路撒稜諸惡黨、及犯重罪諸人。因此二者、皆定吾主死案者也。而聖母仰合主心、不但不恨其凶惡、且願捨己生命以贖之、獻聖子寶血於聖父、爲贖斯人之價。一如聖子向聖父云、父、懇爾宥彼、彼實不知所爲。余靈、汝於仇人何如、汝曾恕爾之仇否。汝仇於耶穌、而耶穌求赦。仇於主母、而主母亦求赦。人仇於

汝而汝不肯赦，是明明不隨耶穌及聖母之表。不隨其表，而欲享其功，可乎哉。

三、效法聖母愛人。○聖母曰：福哉斯人，聽予命，留神於我愛，并效之而愛人。聖額我略納齊央曰：欲得聖母鍾愛之法，莫如愛人。因我之於人，慈悲何如？聖母之於我，慈悲亦何如也。聖梅刀奪云：哀矜貧乏者，天堂爲其償報。按聖基所之意，我助人，使天主若欠我債，故凡愛聖母者，必以愛人爲要務。然不當憑空泛言，當有實行以踐之。無若斯世多人，當無時事。

口稱愛人，一遇事端，大謬不然。又有多人，救人太緩，患難已過，始欲振救。且當救助時，往往言煩色厲，或所給之物，過於微小，救若不救。余靈問之汝心，曾如是否。倘汝欲效聖母，當改此數端毛病，爲主真心愛人。且向聖母云，仁慈之母，充滿愛人之量者。懇爾不忘我之患難，爲我轉求天主，賜我效爾愛主及愛人之德。亞孟。

十六日聖母神貧

一、神貧之德。○凡人處困厄之境，不安其位，心貪所乏之物，斯非神貧，乃惡貧也。設有不貪所無，而心足所有，并日常緊要之物，亦有時屏絕，始可稱爲眞神貧。亞爾備爾篤云，神貧非他，惟爲愛主之故，輕視世物，并不得已之物，亦願有時缺乏。凡離俗超修者，皆當造此絕詣。不然，惟有神貧之名，而並無其實。耶穌在世時，嘗以神貧教人。謂一年輕者曰，售爾所有，給諸貧乏，速來從余。此吾主之言，不論何等信友，皆當遵

從棄俗者，從其全。不離俗者，從其半。遵其內意。蓋彼雖爲身家之計，當以正直之道，圖財謀利。然亦宜脫去物情，置諸意外，能使不爲物累，潛心於救靈要務。否則，迷於世俗，而有墮獄之危。余靈汝果何如。有此神貧之德否。曾斷絕世俗之愛否。聖保祿曰：人心存世俗之愛，天主弗居。可知天主樂居之人心，決不愛世俗之財利。吾人之師表，全在釘死之耶穌，及釘死耶穌之聖母。汝今如何。滿望此心爲天主之聖居，而不遵耶穌及聖母之指引，不愛眞福之神貧，能乎，不能乎。汝其

審之。

二、聖母神貧。○聖母隨聖子之表，影形相從，而於神貧爲尤甚。聖師加尼削嘗以理徵聖母之神貧，曰：父母遺下之產業，聖母惟留一小分，其餘諸物，或給諸貧乏，或獻於主殿。有許多賢士云：聖母自幼發神貧之願，聖母顯於聖婦俾利日大，亦如是言。吾主降誕後，三王來朝，獻許多禮物，而聖母悉施貧人。聖伯爾納多以理證之曰：吾主獻堂時，惟以貧人之規，獻二班鳩。倘三王獻禮，未全施散，聖母必將行富人之禮，獻

羔贖子矣。聖母顯於聖婦俾利日大云。余所有者。全施貧乏。所留者。惟衣食少許。且愛神貧之故。屑配窮匠。工若瑟。親自裁衣縫服。如村婦然。總之。聖母一生。貧乏而已。生極貧。死更貧。梅帶弗拉斯刀等傳說。聖母死時。遺下之物。惟二件長衣。且此二衣。聖母未死前。已給二服役婦女。噫。聖母之神貧如此。余靈。汝之神貧何如哉。明知愛財謀利。爲萬惡之根。而不肯斷絕。明知甘貧好施。養身淡泊。爲立功修德之基。而不肯勇行。如是而欲中聖母之心。欲隨聖母之表。能乎。不能乎。

三、效法聖母神貧。○聖斐理伯納利云、愛財者、不能成聖。聖女德肋撒亦曰、隨喪亡之物者、與物偕亡、習神貧之德者、與德俱生。因神貧之德、能兼諸德、是以吾儕當愛此神貧、可與聖依納爵向主曰、吾主、惟以愛爾誠心、及爾聖寵洪錫、俯賜於我。我卽充裕富饒、不圖外物。倘時遇困乏、當自慰曰、耶穌聖母神貧至極、我何人斯、敢不願如是乎。是以不拘在何地、當效聖母神貧之德。富者輕富、不可過於貪戀、因世物遷留莫定、如浮雲然、有何足貴。然欲知我愛物與否、當視我肯

施與否。當視我失去財物。曾憂苦而致失神安與否。果能好施輕財。則我有神貧之德。可深信而無疑。不特富者輕富。且貧者當甘貧。視窮境爲樂地。以妄求財物之思。迸諸度外。如辣匝祿心順主命。甘爲乞丐。或如古聖若伯。盡失所有。向主曰。主子。主取。讚美主名。若是。則修德不難。而聖愛日增。余靈捫心自問。爾誠若是乎。且凡爲主全棄世物者。毋患哀矜之不能行。特患救人之願不切。切則功超諸濟急之人。聖熱羅尼莫云。哀矜中至美好。至有功者。莫如輕棄世物。余靈望汝

效聖母之表、切愛神貧之德、願覺神貧之效、減爾所需之物。
惡衣蔬食、度爾此生。且向聖母瑪利亞曰、吁、主母、引我遠世
近爾、并賜我常愛爾子、惟一珍寶。亞孟。

十七日聖母貞潔

一、潔德高妙。○拜主之人，爲聖神聖殿，故非潔德以飾之不可。夫潔德有二，心潔，身潔，是也。潔德至高之級，卽絕諸可有之逸樂。因肉身爲吾最大之仇，勝此仇者，光榮甚大，德行甚美，真不可以言語形容。蓋有肉軀之人，竟若無形之天神，且比天神更甚。聖伯爾納多曰：二者之潔，世人之潔，更爲可重。因天神之潔，不勞而得，不戰而成。世人之潔，則備嘗辛苦，與三仇戰爭而來。人而有此潔德，天主爲之好友，爲之淨配。故

聖經云、心淨者、乃眞福、爲其將見天主、在世時、得天主無限光照、如明鏡無光不澈。升天後、得永遠之光榮、更無他德之榮光可比。其一、可隨無玷之羔羊。默照經曰、羔羊所在、童貞隨之。其二、偕諸天神永奏凱歌。其三、得童貞之榮冕。余靈、潔德之尊、之益、之榮、汝曾知乎、否乎。汝知之、而仍眷戀肉身微樂、不躲避污爾害爾之機會、是誠何心。汝知在天神聖、若能翻悔、見此無窮之寶、誰不曰、吾儕癡迷實甚、曷不更潔吾靈、增吾榮光。噫、余靈、汝今在世、尙可爲也、何不及時加勉。

二、聖母至潔。○亞當違命，五官逆理，故此潔德，行之最難。謝主賜我聖母，作此德之芳型。亞爾備爾篤云：聖母稱爲童貞之童貞，非無故也。蓋彼無他人之勸勉，亦無他人之表率，首發童貞之願，爲後世願守童貞者，樹之準則。聖伯爾納多曰：吁，童貞瑪利亞，誰教爾以貞德恆主，度天神之生命乎。聖騷弗老嫻答曰：天主選至貞之女爲母，使彼爲貞德之表率。故聖盎博羅削稱聖母爲首樹童貞之旗者。修士第阿尼削曰：聖母純潔無瑕，超諸童貞之女。爲此，天主聖神稱聖母美如

鳩鵲潔如玉。聖熱羅尼莫云、聖若瑟克守童貞、因其爲瑪利亞之伴衛。有賢人云、聖母珍重此德、無以加尙、甚至爲守此德、肯辭主母之位。故天神初報聖子降孕、聖母卽辭曰、我不識男、此事曷成。後天神解明不失童貞之妙、彼始允爲主母。噫、余靈、汝思之、能不深訝。聖母爲保守貞潔、願辭主母之尊。汝爲些微快樂、一時適意、不克振作己志、斷絕五官之娛、甘受遏慾之苦、致神靈永墮、受無疆之禍。愚乎、不愚乎。

三、效法聖母潔德。○聖盎博羅削曰、保潔者爲天神、失潔者

爲魔鬼爲主仇。潔固不可不守。然聖奧斯定問曰。何舉世蚩蚩者衆。不能保存此德。應之曰。不用法耳。法則有三。嚴齋。避機。祈禱。是也。一。嚴齋。卽克己絕慾。慎守諸司。特慎口目二司。汝宜效法聖母。聖母雖滿被聖寵。尙不敢輕視輕說。舉止端莊。足動人驚異。至論聖母之飲食。聖文都辣及額我畧等。述聖母顯示一隱修士云。聖母孩提時。惟日哺一次。以後習守嚴齋。不敢少忽。余靈。汝曾嚴齋克己否。汝曾非禮勿視。非禮勿聽。非禮勿言。非禮勿動否。汝果已然。更宜加勉。汝果未然。

定志謹守二、避機。卽避去犯罪之機也。聖斐理伯納利曰、爲戰勝五官、宜避罪機。聖母避人瞻觀、故不在外往來。傳云、聖母回家、在表姊產子之前。其故非他、惟避此日親鄰來往故也。爾何人斯、日與親朋往來、今日到東、明日到西、而不知却避靈魂之害。經云、愛險者、險中亡、爾其戒之。三、祈禱。聖母默示聖女依撒伯爾云、我以勞苦祈禱、而積諸德。余靈、汝欲免罪、而立功德、宜務祈禱。更宜懇求聖母。蓋彼雖爲至潔、然就彼者、從未棄絕。亞未辣述曰、有許多受邪誘者、一呼聖母聖

名卽勝此誘。吁、瑪利亞、至潔之母、今地獄中、緣戀淫而受苦者、幾何人。吁、吾主母、賜我在諸誘中、常趨爾前、頻呼爾名云、
瑪利亞救我。亞孟。

十八日聖母順命

一、順命之要。○修士三願中、聽命爲最。因發此願者、將己意見、盡獻天主、并爲天主之故、傾聽人命。長所欲者、己亦欲之、長所斷者、己亦斷之。故於諸事中、常與長上同意同見、毫無彼此之別。然此德不特修士攸關、不論何人何位、皆爲至要。蓋吾人在世、孰無長上。既有長上、不得不行長上所命。然行長上所命、而不隨長上之意願、雖一時能聽長命、終於違逆而不從。余靈、汝欲立順命之德、當與長上同意同見、而後可。

不然，譬之軍士，以自己之意見，逆料將軍之命，或行，或否，悉隨己見斷之，不將傾覆三軍乎？家中亦然，一子忤逆，舉家不安。故此德之緊要何如，自能通曉，而此德之高妙，亦從可知矣。有此德，則謙遜克己，諸德皆全。吾主耶穌三十年中所行何事，順命而已。余靈汝若如是行爲，則靈魂平安，不受物欺，且於天主臺前，可免受判。然而欲行此德，當健捷純全，并如警者然，不論長上何命，不推命者何意，倘所命之事，非明明逆理，必速從之，無敢少違。余靈汝其戒之，當以聖母爲表率。

二、聖母順命。○聖母以順命之德，領報時，自稱婢女。其稱婢女也，何故？聖多默未拉諾應曰：此婢女，或思，或言，或行，從未逆主。而諸事中，常聽主命。聖母嘗自言曰：以其垂顧婢子之微，婢子非他，順主人之命者也。聖奧斯定曰：聖母以順命之德，療治厄伐逆命之病。且聖母始胎，既無原罪，則無逆命之惡根，故其順命之德，較之他聖，最爲純全。聖伯納定曰：聖母無順命之阻，一如圓輪，悉隨聖神運動。又曰：聖母常以主旨，置在目前，順命以符之。如蜜蠟然，爲方爲圓，悉隨作者之意。

聖母順從主命，無不如此。爲此生後三載，親自獻堂。在堂時，謹守堂規，敬聽長命。居若瑟家，雖尊爲主母，然一動一靜，無一不隨若瑟之意。如世之爲婦者，從厥夫命，責撒肋有命而不背，取潔可免而亦行。則雖遠行百里，忍寒苦而不辭。目爲罪人，受恥辱而弗却。其順命爲何如哉。旣而惡王謀害主命，抱子而逃，速即起行。不顧道阻且長，不避風吹雨打，一心聽主命而已。西爾完拉自設問答曰：避厄日多國之事，天神傳示若瑟而不傳示聖母，曷故。曰：欲其習順命耳。聖母畢生，最

顯順命之德者，在獻已聖子，爲人受難而死。聖依奪方敢曰，倘無惡黨，聖母爲聽聖父之命，或親釘己子，未必不願。噫，聖母之順命，尙可言語形容哉。汝其思之，汝其師之。

三、效法聖母順命。○聖母旣爲順命之表，卽極愛順命之人。一、修士聞鐘聲，命至飯廳，然所誦之經文未畢，故未卽出房，聖母卽顯責之。聖母顯於聖婦俾利日大云，聽命之德，領人入天。聖斐理伯納利曰，順命之人，主若不判其所爲，吾主嘗云，聽爾者，聽子。輕爾者，輕子。旣聽主命而行，何判之有。聖母

顯示聖婦俾利日大云。因我聽命之德。主賜一權能。俾極大罪人。欲改遷而就予者。能得罪赦。余靈。汝豈不願得罪之赦。而上升天國乎。汝願之。而不肯遵守上司神父之訓言。不肯順從父母師長之戒命。可乎哉。可乎哉。聖母之聽命。自生至死。顯然明示。其聽命也。全然速然。如瞽者然。不顧命者何人。所命何事。惟一心爲主而行。汝則何如。今汝向聖母曰。吁。吾后。吾母。因爾順命之德。爲我求爾子耶穌。賜我忠心隨爾聖意。及爾聖子之命。亞孟。

十九日聖母忍耐

一、忍耐之德。○人生世上，諸難畢集，苟非忍耐，安能立功修德。惟有忍耐之德者，則多多患難，始而忍受，繼且樂受，終乃渴受。忍受者，肯受諸難，不論何繇，或繇天主，或繇人，或繇自己，或繇時地，一心順主聖命。如古聖若伯曰：主子，主取，悉憑主意。汝若難至時，亦如是說，自能不生怨恨，而諸難悉平。樂受者，爲主喜受諸苦，一切外來之遭遇，不能搖動其心，并恃天主保存之恩，終不失望。如古今聖人，勤行克己，樂受世苦。

得以升天。今汝欲升天，又欲避難，遇苦不受，此豈行升天之路耶。升天之路，在吾主十字聖架，卽在世上各種苦難。爾欲舍此他求，可乎哉。渴受者，爲愛主之故，并欲肖似吾主，渴願受苦，若渴者思飲，趨泉不遑。如十二宗徒，受苦時，喜不自勝。其渴願受苦之心，雖帝王之尊，天下之富，亦不能奪其萬一。問汝此願從何而至，豈不因耶穌有言，爲義而被窘難者，乃眞福，爲其已得天上國乎。夫以暫苦，而得眞福，誰不願之。汝

心曾有此渴願否。汝見聖母之耐苦，能不抱慚無地乎。

二、聖母忍耐。○聖母一生受苦多端。天神告聖婦俾利日大云。聖母在世。生於患難。一如玫瑰長於荊棘。淨配若瑟欲離彼他適。聖母知之。如何憂苦。見聖子隆冬降世。不堪貧乏。臥於馬槽。襁衣裹體。其心悲傷何如。耶穌割損聖肢。鮮血淋漓。哭聲悲慘。聖母之心。亦相與受割矣。避居厄日多國。一路雨淋日晒。所與居者。皆教外兇狠之人。汝思此七年中。聖母嘗何憂愁。吃何辛苦。孩提致命時。諸嬰孩所受之刃。若一一刺透聖母之心。耶穌十二齡講道。三日不見耶穌。此時無一憂。

苦不入聖母之懷。以後三年傳教，法利色俄輩侮辱聖子之言，聖母一一親聆。至吾主受難時，聖母之心，誠爲苦海，無苦不集矣。蓋已聖子，榮福之王，入魔手，被綁縛，受鞭受笞。官長審問如罪人，惡衆視彼爲盜賊。面受唾掌，口受醋膽，直至釘死架上。聖母皆目覩心傷。當其侍立架傍，吾主定其爲衆人之母。聖母卽思衆人將爲罪受罰，且見愛子所受之苦，所流之血，不特爲彼無益，并加彼永遠之罰。心更痛悼不止。繼而聖屍卸下，聖母視軀傷痕，撫歎傷處，目首至足，無處不傷。聖

母之心，如衆矢所集之鵠，痛割深矣。聖身已葬，石板蓋墓，聖母之心，恨不得與吾主同葬。噫，聖母之痛，誰能推測。而聖母於此，無怨言，亦無怨色，一味甘心樂受。致命聖依納爵云：「凡此苦難，聖母無一不忍受，無一不樂受，并無一不渴受。始嘗一苦，願有更大者以繼之。余靈，聖母之忍耐，爲何如乎。自耶穌升天後，見聖子寶血未乾，而如德亞人已受主顯罰。主所揀選之民，爲主棄絕。聖母見之，心傷難白。以後，見主之願日迫，離世之心愈熾。然見聖子之意，尙欲留已於世，亦惟順聽。」

主命並無他念。達味聖王有云，我靈辭物之慰，所思者，惟天主，所樂者，亦惟天主。斯言正於聖母驗之。噫，余靈，汝其思之，汝其效之。

三、效法聖母忍耐。○聖母忍耐之表，當激我效法之心。不論何苦何患，喪名失利，及一切世上逆境，皆當忍受，不特怒恨之心，不形於外，即怨報之心，又宜勿存。諸內，有一隱修聖人諭曰：我有一言，請爾留神聽之。倘有人出言侮爾，爾覺心中

惘然不快，爾宜靜默無語。及至心怡神恬時，若事宜表白，可

婉言導之。倘爾有責人之分，忿怒過時，然後可責。當心煩慮亂時，宜回心向主，求主賜爾不出怒言。又凡不愜爾心之事，或大或小，求主賜力忍受。其至要之法，即屢次默想忍耐之德。爲我積德累功，最爲緊要。蓋苦難非他，乃天主所施於人，俾脫離世物，而不營心犯罪之端。聖濟彼良曰：忍耐能免罪脫慾，使人成聖成賢。昔聖若望見天朝諸聖，手執得勝枝，其意若謂：人欲升天，皆當致命，或流血，或耐苦。聖額我略曰：我若忍耐，不需刀鋸，而成致命。聖女德肋撒云：抱十字架者，不

覺十字架，定心忍受諸苦，卽諸苦畢矣。吁，至慈之母瑪利亞，爾爲無玷之母，甘心忍受無限之苦。我乃獲罪多端，本宜下墮地獄，竟不願稍受諸苦，以補前愆。我母，求爾賜我不脫諸苦，并願甘心忍受。余之所望，惟在爾轉禱。亞孟。

二十日聖瑪利亞

一、聖名意義。○瑪利亞之名，其義不一。或謂皇后，或謂光明，或謂照光，或謂明師，或謂大海，或謂苦海，或謂海星。稱之謂皇后者，因其爲天主之母，位超萬有。神聖之高位，俱在其下，而莫之能並。稱之謂光明者，以其靈魂光明。大罪之昏黑，小過之暗影，一點毫無。眞如若望宗徒神目所見之女，三光盡飾其軀。日飾其身，月飾其足，星飾其首。稱之謂照光者，因其光照普世。善人受照，得以加善。惡人受照，得以減惡。復得所

失之光。故聖經稱之謂日月，如日以照晝，月以照夜。稱之謂明師者，因其以言引人，以德迪衆，如明師之訓以道德。稱之謂大海者，因其爲諸德之聚，多奇之會，如大海爲諸水之匯。聖伯爾納多云，聖母恒開慈悲之懷，虜人求贖而贖，善人求進而進，罪人求赦而赦，病人求痊而痊，憂人求慰而慰，故謂之大海。稱之謂苦海者，因其甚愛天主，知世之罪，念天主之辱而苦。甚愛聖子，視聖子之苦而苦。甚愛世人，念世人多落於非，多墮地獄而苦。聖熱羅尼莫曰，欲知聖母之苦，謂之致

命尙不足，故謂之苦海。稱之謂海星者，因其引導世人修德行善，以登天堂福岸。聖盎博羅削曰：吾靈若舟。我望聖母，引我正路。狂風雖發，靈必不覆。世逆疊來而不裂，魔計屢攻而不溺。起程吉，繼程樂，終程安，順至天堂福岸。奇哉瑪利亞聖名。世人之口，天神之言，卽極其精，亦不能盡讚其美。余靈瑪利亞皇后也，呼厥名，以讚美之。瑪利亞光明也，稱厥名，以頌揚之。瑪利亞照光也，爾心恒暗不明，呼厥名，以光照爾。瑪利亞明師也，呼厥名，以訓迪爾。瑪利亞大海也，呼厥名，賜爾滴。

水滅爾慾火。瑪利亞苦海也。呼厥名。賜爾忍苦。加爾致命之恩。瑪利亞明星也。呼厥名。引爾升天。享受無窮之福。

二、聖名能力。○聖伯爾納多云。瑪利亞聖名。足使魔鬼驚懼。多瑪斯更比云。聖母之名。甚爲有力。魔鬼遇之。如觸雷電。驚而却走。駭而僵仆。蓋因此聖名而勝魔者。不計其數。日本國有一信友。魔鬼忽現。驚嚇之。且欲殺之。彼向魔鬼曰。我無兵禦爾。如主所許。隨爾何爲。我惟以耶穌瑪利亞之名護我。此言甫出。頃刻。地裂魔陷。聖安色爾莫述曰。無數人呼聖母聖

名而逃避諸險。聖文都辣向聖母曰。爾之聖名。極榮極大。死
候呼爾。不懼地獄。因魔鬼一聞爾名。卽速離所圍之靈。又云。
世上從無軍旅。如爾聖名。爲魔鬼之驚敗。人靈之保障。聖日
爾孟曰。被魔所苦者。一呼爾名。卽得安慰。眞福亞楞曰。我惟
一言亞物瑪利亞。而魔逃獄震矣。余靈爾值魔誘時。何不稱
厥聖名。助爾戰勝。利加爾道聖老楞曰。除耶穌聖名外。無有
加人安慰。給人聖寵。如聖母聖名。凡奉事聖母者。能覺聖名
之能力。而攻不潔之誘。蓋瑪利亞爲貞潔之伴。經云。貞女之

名瑪利亞。而貞女之名。不能離潔。可知瑪利亞之名。即爲貞潔之名。瑪利亞稱之於口。貞潔可守之於心。余靈欲知爾潔德何如。當以爾呼聖母聖名証之。

三、聖名甘飴。○瑪利亞爲吾人之母。故瑪利亞之名。即爲我母之名。旣爲我母之名。必樂聞之。而樂呼之。蓋未有子。而不喜稱其母者。是以不論何事。常呼之。賜佑。歷來聖母孝子。大都如此。聖安當巴徒人。每稱聖母之名。覺非常神味。曰。若蜜之於口。若樂之於耳。甘飴莫解。有一主教。每稱聖母聖名。覺

非常悅樂，常若稱之不足，必大其聲，而疾呼之。又有一學士，每稱聖母聖名，覺香花撲鼻。眞福蘇雙覺非常喜悅，不禁下淚。且覺己心從胸中飛出，直至聖母臺前。故屢嘆曰：瑪利亞，爾聖名已如此甘飴，爾將若何？因爾甘飴之名，犯罪者，回心向化，冷淡者，灼熱厥心。聖文都辣曰：眞心呼聖母聖名者，莫不受主聖寵，而覺己心之熱。不論何等罪人，不論如何硬心，呼厥名，即變硬爲柔。故聖經以其名比之於油，因油能治傷，散香，發火。聖母之名，亦是如此。能治罪人靈魂之傷，能發善。

人德行之香，能灼人愛主之火。聖日爾孟云，呼吸爲肉身生命之據。屢稱聖母聖名，爲神靈生命之據，故神聖亦樂聞之。聖母顯於聖婦俾利日大曰，天上天神，聞人呼我名，即羣來靜聽。耶穌亦顯謂之曰，爾稱聖母聖名，其言甚飴，甚愜我心，使我不能却爾所求。余靈，此名甘飴至極，充滿聖寵，爾宜稱之不厭。請爾聽多瑪斯更比之言，曰，神昆，爾欲患中得慰，趨至瑪利亞前，呼厥名，而奉事之。且托爾於彼，并與彼同喜同憂，同行而尋耶穌。尋獲之後，即與耶穌瑪利亞，以生以死。

二十一日 天主聖母

一、主母之尊。○天下公論，母貴悉如子貴。子爲天子，母爲庶民，必無之理。天主之位，尊榮無比，則其母之尊榮，可想而知矣。吾儕敢不尊重乎。聖多瑪斯驚訝曰：天主聖母之位，使瑪利亞若有無限之美。聖伯多祿達彌盎曰：主母之稱，足使吾儕驚奇懾服。對此高位之光輝，莫敢倨傲。亞爾備爾篤云：無窮之子，使其母亦若爲無窮。故聖奧斯定曰：子敢直言，天主聖母之尊，即聖母亦不能自解。安德肋克來大欲解主母之

尊、忽覺神遊天上、曰、不能解此、不能解此、然則誰能解乎、彼即應曰、惟天主能相稱讚頌、外此皆不能。蓋聖母既滿被聖寵、爲聖子降生之母、則聖母之軀、爲耶穌之軀、并與天主聖父、同有掌護聖子之權、有其權、必有其位、則瑪利亞之尊貴、高不可尙矣。故聖謠比發尼曰、天主之外、聖母最高。又嘆曰、吁、貞潔之胎、包涵上天之圍兮、天地不能容之天主、爾則懷之。吁、爾胎較天尤大兮、無限之天主、竟爲爾所限兮。余靈、爾見聖母如是尊貴、安得不傾心讚頌、奉事天主之外、虔心奉

事聖母耶。

二、聖母肖似天主。○聖母與天主，最爲相似。因相似者，莫若母子。而聖母之子，即天主聖父之子，與聖父同性同體，故云肖似天主，言非過也。況聖母於愛德爲最熱，而愛德使人肖似天主。聖母既有至熱之愛，則其肖似天主，明矣。聖盎博羅削解聖經封泉之句，曰：聖母稱爲封泉，因其形天主之像，不爲污泥所濁。聖伯爾納多向聖母曰：爾最密邇天主。彼在爾，爾在彼。爾著彼，彼亦著爾。爾著彼以軀體，彼著爾以光榮。爾

若彩雲衣日，爾亦爲光日所衣。聖第阿尼削謂，聖母之身，極呈天主之象。故其初見聖母，出語人曰：若無信德，明知天主惟一，將認彼爲天主。安德肋克來大以聖母爲天主之像，最肖天主者。余靈爾受洗時，天主聖像印爾心中，本宜全心保存，不致污壞，而今何如？恐爾不知此珍此寶，早已棄之污泥，踐之足下，而毀壞之矣。倘爾未嘗污穢，宜刻刻留心保守。倘已污穢，而未全毀壞，宜以痛悔之淚濯之，以補贖之帕拭之。天主仁慈至極，將必鑒爾微忱，賜爾永存不廢。

三、聖母之權，達夫聖子。○耶穌三十載中，惟以聽命爲務。經云，耶穌返納匝肋德而屬下之。此時聖母雖知耶穌爲天主，至尊無對。然亦知母有命子之權，故命耶穌如母命子。而耶穌盡其爲子之職，一一敬聽無違。事無鉅細難易，有命卽從。耶穌在世，如此順命，而今在天，何獨不然。其順命之德，與前無異。其尊母之情，有增無減。故聖母在天，亦有命子之權。而耶穌仍若有順命之職。在昔撒落滿總王之母，備忒撒亭入朝見子。王卽退位拜迎，置之己座。太后有問，王卽應曰：我母。

請爾諭之，余不能反顏，不聽爾命。基利斯督於聖母亦然。所異者，惟撒落滿行不顧言，而基利斯督言則必行耳。聖伯爾納多嘆曰：噫，主聽人命，無名之謙。人命天主，無比之位。聖伯多祿大瑪舍諾向聖母曰：爾至天主威嚴寶座前，非求，乃命非婢女，乃主母。蓋自爾胎取肉軀者，永不逆爾。余靈，爾知聖母，有如是大權，何不呼籲，求其賜佑，何不孝事，以得其寵。世有勞心勞力，不避艱險，以得長上之微寵者，爾何不稍盡爾心，永爲聖母殊寵之子，勉之哉。

二十二日世人之母

一、衆人之母。○凡人犯罪，失去主寵，即失去靈魂生命。必須聖子親自降世，釘死架上，以復吾生命。而聖母有分於救世之工，故獻己聖子時，一如生吾神靈，賜吾聖寵之生命。是以聖人有云，聖母二次爲母。一、因聖神之工，以己淨血，生吾主之身。一、因吾主聖血，以己轉達之功，生吾神靈之命。故吾人爲聖母之次子。路加聖史記曰，聖母產厥首子。有賢士設問曰，使耶穌爲其首子，當必有他人爲其次子。然按信德道理，

聖母從未生他子。以是知吾人爲其次子，即爲其神子也。吾主嘗親自解之。一日，聖女日多達默想聖經產厥首子一言，滯疑不解。吾主顯謂之曰：余爲瑪利亞首子，其餘諸人，皆瑪利亞次子。聖母見聖子受諸苦難，不勝憂悶，如利刃刺心。即於聖心中，產育吾人，作吾神靈之母。因是聖子指若望而向聖母曰：女人，彼爲爾子。又指聖母而向若望曰：彼爲爾母。聖人解曰：若望，衆人之像也。聖母爲若望之母，即爲吾衆之母。聖母顯於聖婦俾利日大曰：予如慈母，爲救子於死，願投身

劍戟。凡爲我子者，雖罪重惡多，求我，我必扶助。余靈爾何幸乎。有如是仁慈之母，常救爾助爾。爾可與聖文都辣向爾曰：我靈，爾有何懼。爲爾永遠救靈之事，眞可無懼。因爾救靈之案，在爾兄吾主耶穌及爾母瑪利亞之手。聖安色爾莫想到其間，不禁高聲歎而呼曰：吁，眞福之依恃，無恐虞之地兮。天主聖母，亦爲吾衆之母兮。

二、孝子之母。○聖母雖愛衆若子，然愛渠者，特愛之。聖伯爾納多曰：凡愛聖母者，不特得聖母之愛，且得聖母之鞠育。聖

母之扶持。聖多明我會修士名類奧那爾，日常托已於聖母。臨終時，見后在側，謂之曰：爾願死，而至余子及子之側乎。修士問曰：爾爲誰。后答曰：予乃仁慈之母，爾常呼我，我故來接。言畢，氣絕而終。聖備爾克孟屢向聖母曰：福哉，愛爾之人。我若愛爾，必得恒久之德，及一切所求。故不住口曰：我欲愛瑪利亞。夫愛慕聖母，既有如是大益，吾人不當盡心竭力愛之哉。愛之如聖達尼老，常論聖母，動人熱愛。一日，同一司鐸，前往敬拜聖母像。鐸問曰：爾愛聖母若何。聖人應曰：予何言哉。

聖母乃我母也。愛之如聖類思。蓋彼一聞聖母之言。面赤神
慰。顯其愛慕之心。愛之如聖方濟各。騷拉諾。若癡若醉。屢操
樂器。在聖母像前。奏歌讚頌。總言之。吾人當盡心力。用諸善
法。以愛聖母。聖母必愛吾更甚。聖伯多祿達彌盎向聖母曰。
我知愛爾者。終不能與爾愛爭勝。一日。聖亞爾方騷在聖母
像前。向聖母曰。至可愛之母。我知爾之愛我。不及我之愛爾。
聖母卽於像中。連聲應曰。亞爾方騷。是何言也。我之愛爾。比
爾之愛我。真不啻霄壤矣。余靈當竭爾心力。愛此可愛之母。

彼將愛爾萬倍。聖文都辣嘆曰：愛敬此后者，乃眞福。因此慈后終不讓愛渠者，逾厥愛也。

三、罪人之母。○聖母親示聖婦俾利日大云：我不特爲聖人及義人之母，亦爲罪人改遷之母。聖額我畧書於公主瑪帝奪曰：若爾定志改遷，必能尋獲聖母。蓋彼愛爾，比爾生身之母，更爲熱切。然而欲爲其子，當先離犯罪之端。利加爾道有云：欲爲聖母之子，先當脫罪。故有重罪者，不足稱爲聖母之子。聖基所落曰：凡違聖母而行者，顯証不欲爲聖母之子。因

聖母謙遜，罪人驕傲。驕傲者非其子。聖母清潔，罪人污穢。污穢者非其子。聖母仁愛，罪人忿恨。忿恨者非其子。有一罪人向聖母曰：請示爲母。聖母即應之曰：請示爲子。余靈爾欲爲聖母之子，請爾脫離諸罪，定志悔改。倘爾無力，則求聖母賜爾改過之恩。聖多瑪斯云：罪人之祈求，能得諸罪之赦。然不因罪人所求之力，實因吾主親許之故。主曰：求則得之。聖安色爾莫云：雖求者無功，然聖母之功，能補其缺。聖伯爾納多勸罪人曰：因爾無功，故因聖母而得所求。蓋聖母甚願吾人

改惡從善，得與聖子協和，故甚願爲爾轉達。譬之一母，知己二子相恨，必用諸法，使之和愛。聖伯爾納多云，瑪利亞爲耶穌之母，亦爲吾人之母。見吾人犯罪，爲其聖子之仇，必勸之和睦，然後心安。因此聖母顯於聖婦俾利日大云，罪人不論有何罪惡，若肯回心向子，予必收納。予不視罪之重大，惟視改過之誠心。其身所有之傷，不特不能使我棄離，且使我傅油療治，徵我爲仁慈之母。余靈爾欲聖母療治爾傷，當趨至聖母臺前，跪披膝下。如聖伯爾納多所云，堅持信心，不

遺直至降福、取爾爲子、爾宜向聖母曰、天主聖母、我靈之望、
我重大罪人、弗敢求爾助佑、然爾仁慈無涯、求爾俯聽我禱、
賜我痛悔告解、賜我真心定改、生前立功修德、死後永享榮
福。亞孟。

二十三日吾等之望

一、衆人之望。○信友之望聖母，無他，惟望聖母轉達。凡不能求得之聖寵，因其轉求而恩賜。聖安色爾莫曰：吾儕祈求聖母，因其所有之功，能補吾不足，而賜吾得獲所求。蓋吾人本性卑賤至極，不足與至尊至貴之天主，互相告語。有聖母轉達，纔可獲吾所求，以盡當然之責分。昔天主告梅瑟以金作贖罪之臺，爲己與人通言之所。聖人解曰：此臺，聖母之像，吾人因聖母而得與主言也。聖依肋納自問曰：天主聖子未降

孕前，爲何主遣天神下降，求聖母允許，而後成其降生之奧。
答曰：其故非他，惟欲聖母爲諸美善之源。是以欲得諸恩，望
聖母而後可。聖瑪弗楞向聖母曰：主母，懇爾常垂眷顧，展爾
仁慈大袍，護庇吾儕。因天主之外，惟爾爲吾全望。又曰：亞物，
我靈之望，信友之命，罪人之托，普世之生活。賢士白老削向
聖母曰：吁，瑪利亞，爾旣顯爾如此慈善，如此可愛，安有癡愚
若是，而不願愛爾。亞物，失恃者之望，無靠者之依。凡諸恩，惠
皆爾宏施。爲此聖文都辣曰：吾儕當視聖母之手，無時或閒。

因彼手不輟施人所欲之恩。噫。世上驕傲而得謙遜。忿怒而得良善。失望而得恃怙。罪污而得貞潔。有下獄之險。而得常生者。不知凡幾。凡此諸恩。皆自聖母而來。聖母亦曾親許之曰。後人亦將於我乎頌讚矣。聖伯爾納多繼之曰。普世果將讚爾。稱爾爲眞福之人。蓋彼因爾得永遠之生命。天上之榮光。故吾儕宜讚頌天主。稱揚其美。賜吾如此美善慈愛之母。余靈爾宜以文都辣之言自勉曰。卽或天主棄我。我亦願愛主。我將執其足。至得降福而後釋。我若絕無他法。卽藏主五

傷中、俾天主不能逐吾於五傷之外。若我救世主甚怒我、而不聽我求、我即跪聖母足下、臥地不起、至得我罪之赦。我知慈悲之母、終肯憐我苦、爲我求主、寬赦我罪。且偕聖安帝默向聖母曰、吁、瑪利亞。請爾回目、憐視爾僕、我乃全靠於爾。二、罪人之望。○天主造天覆我、造地載我、造日月光照我、日以照晝、月以照夜。名士烏高曰、日表耶穌、光照主愛之善人。月表聖母、光照幽暗之罪犯。若爾不幸、而居重罪中、失去義德之太陽、聖寵之光明、當回顧聖母、仰此明月之光、必能光

照爾靈。有一賢士、勸諸犯罪者、趨至聖母懷中、以尋救命之地。因藏聖母懷中者、主必不能擒獲。直至聖母轉達、主赦彼罪、始可出外。余靈、爾若犯罪、懼主義怒、卽當趨向聖母、求彼轉達、賜爾恩寵。聖婦俾利日大云、聖母爲迎日之星、倘罪人覺有愛聖母之心、卽知主寵將至。聖文都辣欲罪人壯膽求聖母、曰、罪人之靈、如險海之舟、被風浪衝激、幾至覆溺。畏主義怒、幾至失望。卽聞天主指彼海星、向罪人曰、毋失望。舉爾目、放爾膽、此星引爾登岸。凡望聖母之佑者、無懼天主聖怒。

因聖母必將蔭庇。故教會稱聖母爲桐樹。因桐葉盛大。可避雨。避日。聖母亦然。凡懼主怒之人。至彼足下。可得蔭庇。先知依撒依亞向主云。主。因吾等之罪。而大怒興起。惜無人挽回爾。聖文都辣自問曰。先知曷爲此言。即答曰。因聖母未生。無人止主義怒。今則不然。主怒。聖母止之。聖子欲罰罪人。而以手鞭之。聖母卽以手阻之。且不特息主義怒。并能使主施寵罪人。聖母嘗謂聖婦俾利日大云。不論何等罪人。終能因我而得主寵。一日。聖婦聞吾主語聖母曰。使路濟弗爾謙己求

爾亦能得主聖寵。余靈爾雖有罪，苟望聖母，必得主寵無疑。人無善惡，聖母盡抱之於懷，無一遺棄。如諾厄之舟，諸獸並畜。所異者，入諾厄之舟者，進則狼，出亦狼。進則羊，出亦羊。而入聖母懷中者，進爲狼，出則變狼爲羊。進爲獅，出則變獅爲鵠。入者罪人，出者義人。由此觀之，聖母非罪人之望乎。聖安當述曰：一罪人至主前審判，其側魔鬼訟罪，聖母助佑，魔以罪人之罪，置於天平，見罪甚重，聖母卽以手置盤，罪即輕矣。聖母且告之曰：倘爾肯改，因我轉禱，主必赦爾。余靈聖母旣

如此慈善，誰該失望。聖母爲無靠者之倚，況其他乎。我靈必無所疑。凡望聖母者，必得所求。爾宜向聖母曰：我母，求爾終不離我，爲我轉求。迄我升天，得侍爾側，跪爾足下，讚爾謝爾，愛爾於無終。亞孟。

二十四日進教之佑

一、愛慕教會。○若望宗徒見一方城，洵美且好，城上至高之處，可見合城。賢士想像云：此時雲中現一女子，甚爲可敬，其日常注此城。在城諸人皆瞻仰之，望其護佑。雲間懸一匾額，上書我日夜注望此城。許多聖人解此方城爲教會之像，故欲表聖母愛教會之情，莫如想像其目注此城，依依不舍。因目爲熱愛之門，凡諸性情，皆目中顯著。如目垂視，以昭恭敬。目亂動，以昭心中不安。總之，各類性情，目能表示，而性情中

最易顯示者、莫如熱愛。故見聖母仁慈之目、常注視教會、即知其愛慕教會、如何懇摯、如何熱切。蓋聖母既爲救世之母、卽有愛教會之職。况聖母仁慈至極、卽無其職、亦將愛之不已。再者、聖母之心、與耶穌聖心、同仁同愛、教會既爲耶穌之淨配、耶穌必愛之至切、聖母亦愛之至深也。何者、同愛故也。蓋聖母爲聖子之故、愛慕教會、求聖子加恩賜佑。耶穌爲愛慕聖母之故、凡有所求、全賜教會。并付聖母大權、能施恩寵於教會。故吾儕所得之恩、全因耶穌聖母相愛、并因彼此愛。

我而來。余靈聖母如是愛慕教會，吾儕奉教人，能不以愛還愛乎。凡教會所需之恩，得不全心向聖母哀懇乎。

二、治理教會。○聖教會如一大舟，進之者，得存靈魂生命，得升天堂樂岸。然而世海迷茫，變端百出。俄而風發浪湧，俄而暗礁海峽，使無精熟舵師，難免覆溺之患。幸有聖母精練舵師，精熟天堂之路，何者當避，何者當行，知之甚明。蓋聖母嘗懷真主，卽聖經所言之正道，真實生命。是以從者不差，信者不謬，而終至享受眞福。教會又比之邦國，聖母如謀臣策士，

治理江山，俾風移俗易，止於至善。試看耶穌升天後，訓宗徒降生之事，并告以如何效法聖子。訓精修者，如何克苦，如何默禱。訓童貞與節婦者，如何守貞，如何保潔。總言之，殫心竭力，治理聖子之國，攻斥異端，傳解聖道，助傳教士顯多奇蹟，以徵教會之眞。聖額我略顯迹者，在異教人中，瑪利亞偕若望顯示之，并諭聖若望親解聖三奧理。至今東邦多地，不受異端之毒者，惟此故也。又有教皇依諾增爵第四位，遣聖伯多祿致命者，入異教人中。聖人誦經時，聖母謂之曰，我爲爾

求主，使爾信德終不搖動。自是聖人神勇非常，至爲主光榮，致命而死。至論聖母治理教會，顯蹟甚多，茲難盡述。有一眞福亞爾備爾篤，以聖母之名，顯多靈蹟。耶穌會士加司巴罷爾才，一日，受主默牖，聚衆孩童，同往撒拉城，異教堂內，在此豎立聖架，異教人驚惶無措，奔逃他處。鐸德欲後人知爲聖母之力，即改爲聖母堂，至今稱爲聖母得勝堂。可見聖母治理教會，無時或間，無地不行，無法不用。吾儕幸在教會，得聖母如是周全，能不聽其指引，聆其教誨乎。

三、護佑教會。○聖母之於教會，不特愛之治之，且佑助之。聖教會第十六世，回教人攻歐羅巴洲，將滅聖教。奧忒利大將若望，出陣前，矢願朝拜聖母聖室，求聖母護佑。臨戰時，羅瑪士民祈求聖母，恭念玫瑰串經。當熱心同禱時，教皇比阿第五位，高聲大言曰：教兵戰勝矣。未幾，果得捷報。教皇即欽定玫瑰瞻禮，記念聖母之恩。且命聖母禱文內，加進教之佑一句。後第十七世，回人率兵二十餘萬，在未恩那城下交戰，竟被數萬教兵戰勝。三十年後，總王加祿第六位，因聖母助佑，

戰勝回教人，解高爾甫之圍。總之，聖母之護佑，久常廣大。凡攻聖子之國者，必以己之權能，戰敗無存。凡助教會前往開拓之法，聖母一一用之。吾儕想聖母如是佑助教會，能不同聖文都辣讚嘆云，聖母，天主之後，爾名可謂全能。瑪利亞，爾誠爲不可破之楯。爾可與儒弟德同聲曰，攻我民者，乃真禍。因全能天主，將起而報厥仇也。吾儕當同教會，在聖母臺前，向聖母曰，請爾救諸困乏者，壯畏縮者之膽，慰諸涕泣者。望爾代祈爲衆民，轉達爲修士，爲向善女輩。

二十五日大能之母

一、聖母轉達之能。○凡子之權，不論如何高大，即天下之民，盡屬彼權，母必不屬。耶穌在天，雖坐聖父之右，其權在諸受造之上。然在世時，嘗謙卑自下，聽聖母之命。聖盎博羅削曰：耶穌定瑪利亞爲己母，分當聽聖母之命。爲此利加爾道有云：不特聖母屬天主之意，且天主亦若屬聖母之意。請爾思想，其能何如。聖母在世，有此大權，而今在天，想亦必有。既有此權，則聖母之祈求，吾主不得不聽。聖文都辣曰：惟聖母有

全得所求之特恩。因聖母之祈求，非凡人之祈求，乃主母之祈求。聖伯多祿達彌盎云，聖母求主不拘何恩，天主甚重視之。極願中厥聖心，甚至聖母之求，似命而非求矣。是以許多聖人稱聖母爲全能，卽言天主聽聖母之命，使聖母無所不能。所異者，天主之全能，爲本性自有之全能，而聖母之全能，爲天主恩賜之全能耳。一日，聖婦俾利日大聞吾主語聖母曰，我母，爾知我愛爾如何，爾不拘求我何事，我必承順無違。昔我在世，我所欲者，爾全付於我。今爾在天，爾所欲者，我亦

願全付於爾。故聖伯爾納多向聖母曰：惟爾願，諸事悉成。亞爾備爾篤代聖母而言曰：人當求我願，因我願，諸事成矣。爾可向聖母曰：聖母，吾儕之轉達，爾心甚綿，見諸困苦之人，不得不覺心痛。爾在天主臺前，能助求爾之人，請爾爲吾轉禱。因吾趨爾臺前，吾之願望，全在於爾。倘吾禱不能動爾心，爾乃仁慈至極，自動爾心。毋忘天主付爾之能，爲救吾衆。余靈，爾果依賴聖母大能，主必全賜爾所求。在昔高利奧稜發兵圍羅瑪城，羅瑪人遣使求和，不聽，卒遣敵將之母，其母至，惟

出一言。高利奧稜即班師釋圍。聖母之轉求。如何有力。更不可言而知。魔謂聖多明我曰。聖母一嘆。較衆聖之祈求。更有能力。余靈爾有何疑。還不依靠聖母轉達。以得諸恩惠乎。天主仁慈。賜爾轉達之母。爾還不感謝天主如此大恩乎。爾今定志。常恃聖母轉達之能。賜爾諸恩。感謝天主無限仁慈。永爲聖母孝子。

二、聖母伏魔之能。○聖母爲神聖之后。其權能不特達乎神聖。且達乎魔鬼。天主親示魔鬼曰。將有一女踏爾首。言瑪利

亞之權能、馴服魔類也。聖母親向舍納伯爾納多曰、我之權能、直達乎魔鬼、因我得勝之、而馴服之也。聖悖路諾云、厄伐被魔鬼戰勝、而世有幽暗、死亡。聖母戰勝魔鬼、而世有光明、生活。俾居世之人、得見真實道理、能行真福道路、而享永遠生命。且聖母禁縛妖魔、凡敬聖母者、不能受害。經云、我已舉矣、如巴爾瑪於佳得山。巴爾瑪者、得勝枝也。猶言聖母得勝羣魔、執枝奏凱也。亞爾備爾篤解曰、天主聖母若向吾人云、仇敵攻爾、來求我助、我必顧視爾、壯爾胆、因我爲爾扶助、爲

爾得勝也。故教會讚美聖母曰：爾威嚴整飭如蒞軍，因此蒞軍，獄門打破，魔壘毀壞，靈魂仇寇低首下心，而吾靈得凱旋之樂。經記古教時，如德亞民得勝寇仇，全賴結約之匱，結約之匱所在，即獲大勝。聖人有云：結約之匱，聖母之像也。因結約之匱內藏瑪納，而聖母內藏聖子耶穌。凡魔攻吾，而求其護佑，魔必逃遁無疑。聖文都辣設喻曰：魔鬼如盜賊，盜賊惟深夜中敢入而劫竊，迨東方微明，即奔逃不暇。魔鬼亦然。入寢室時，魔敢入而劫竊，一見聖母，即如黎明東啟，光照

人靈、魔卽遠避、如避死然。天主親示聖婦俾利日大曰、聖母於魔鬼、有極大權能。魔鬼攻人靈魂、聖母惟遠視之、魔卽旁徨無措、疾走速奔。利加爾道有云、聖母如古教時火雲二柱、雲柱遮日、聖母遮天主公義之日。火柱照夜、聖母光照人靈、助人攻魔。聖文都辣云、魔見聖母、如蠟受火、頃刻消融。余靈、聖母有攻我敵仇之大能、當誘惑時、曷不依賴其能。向彼求救曰、大能之母、魔鬼之驚、魔鬼之敗。求爾顧我、拯起於我違德。

二十六日仁慈之母

一、聖母仁慈。○王者，不特以恤民爲本，而發仁德，亦當賞罰分明，而留神大義。惟后不然。聖母，我后也，非公義之后。聖母，我母也，乃仁慈之母。爲此教會訓諭吾人，稱聖母爲仁慈之母。達未聖王向默西亞云，我嘗聞之，能德歸於天主。主，仁慈乃歸於爾。日而雙解曰，天主之國，包涵公義與仁慈。其後二國並分，公義之國，歸於天主。仁慈之國，歸於聖母。而聖寵之庫，悉予聖母掌管。是以不論何人，欲得天主聖寵，當趨至聖

母臺前。聖多瑪斯云。聖母懷孕而產聖子。即與天主分據權能。耶穌爲公義之王。聖母爲仁慈之后。蓋天主聖父。定吾主爲公義之王。審判世人。達未云。主。爾以公義付於王。以義德付於太子。聖文都辣易之曰。主。爾以公義付於王。以仁慈付於太后。藹爾南篤亦云。天主以賞罰之權。付於聖子。以愛護困厄之權。付於聖母。吾儕亞當之裔。窮獨無靠。旣知在天有如是美善。如是仁慈之母。當如何欣幸。如何快樂。古王亞蘇藹老。發令殺國中如德亞人。后叔瑪爾道。被至王后前。託以

轉求賜赦。后始不允。瑪爾道。垓向后曰。請爾記憶。王拔爾爲后。超諸如德亞人。非爲爾一己之故。余靈當爾畏主公義時。亦可向聖母曰。我母。請爾記憶。天主拔爾爲天地之元后。非特爲爾。亦爲哀憐護佑世人。王后愛斯戴爾入朝。王卽藹然問曰。后。爾欲何求。后應之曰。倘我得寵於爾目前。賜宥我民之生命。王卽聽之。立命收回死令。余靈亞蘇藹老爲愛后之故。尙聽厥請。况天主愛聖母。較勝萬倍。豈有求而弗應哉。爾可全心依賴聖母。聖母至能至慈。至其前而懇切哀求。必得

所欲，聖伯爾納多曰：聖母甘飴至極，毫無嚴厲可懼之形。誰不敢趨其前，求其護佑。余靈爾見聖母如此仁慈，可向聖母屢求之曰：聖母瑪利亞，我慈母，我恩母，憐憫我罪人，罪大惡極云云。或曰：天主聖母，切我罪人，托居蔭庇之下云云。

二、依賴聖母。○聖母既如是大能，如是仁慈，吾人自宜依靠，以吾身靈諸有，全置聖母手中，使之掌管。余靈，倘一家主得如是忠能之人，以掌銀庫，尙有何事不放心耶。我之司庫者，聖母瑪利亞也。以聖母而掌予所有，必諸事周全妥適。聖母

顯於聖婦俾利日大云。我乃仁慈之后。罪人之樂。導引罪逆。至上主之門。世上無一罪犯。我不施之以仁慈。卽或滅其誘惑。無非我仁慈所致。又曰。衆人稱我爲仁慈之后。洵矣善矣。所惜者。世有多人。能求我而不求。以致死後。不能得我仁慈。而下地獄。余靈如是言之。不論在何景況。宜常求聖母。倘爾受誘。求而恃之。得以戰勝。蓋聖母足躡魔頂。勝之甚易。護爾如楯。以致仇人之矢。不能中爾軀。倘爾私欲亂動。求而恃之。彼卽賜爾恩寵。或使全滅。或不順從。倘爾有罪。求而恃之。彼

乃罪人之托，必拯起於爾違德，不致永居惡內。爾懼世俗之
謊乎？求爾聖母，賜爾在世，不爲世累。如梅瑟所見之荊，焚而
不燬。爾若家室不安乎？求爾聖母，賜爾平安之喜，和睦之恩。
彼與若瑟同居數十年，爾我無分，從未弛愛。爾若窮困，求聖
母賜爾或富或忍。爾若抱病，求聖母賜爾忍耐，或減爾痛苦。
蓋彼在十字架旁，備受諸苦，明知爾受之痛，必然慰救。總之，
不論何災何患，當至聖母臺前，如子向母曰：我之主母，我之
母，望爾記憶我，皆繫爾。乃爾保我護我，如屬於爾之物一般。

二十七日當求之母

一、祈求之要。○教會學士及諸聖師公論，不求聖母者，難得救己靈魂。蓋天主之恩，主欲聖母轉達，而施給吾人。故教會，在公堂祈禱中，稱聖母爲吾等之生命，吾等之望云云。且聖母以智德經言示人曰：靠我而行者，終不犯罪。顯揚我者，必得常生。由此觀之，祈求聖母，爲吾人至要之端。巴西畧公議云：吾人最當爲者，趨至聖母臺前，求彼爲吾轉禱。聖伯爾納多曰：信友，今爾知天主如何願吾人光耀其母，常求其母矣。

聖教會稱聖母爲上天之門，亦自有故。譬人欲進宮闕，不得不由門戶。吾人欲進天堂，不能不由聖母。聖日爾孟云，不由聖母而得救已靈者，無之。利加爾道云，不論何人，在此世海中，而不居聖母之舟，必將沉溺無遺。猶言，人在世度生，而不求聖母扶助，將必溺於重罪，不克登彼天岸。故吾儕在此險海，須祈求聖母。如當日宗徒祈求耶穌曰，吾儕將死，主救吾等。如聖若望大瑪舍諾曰，潔淨無玷之母，速來救我，脫我於永罰中。然而欲脫永罰，須常留聖寵，而聖寵當因聖母而得。

聖安多尼云、無聖母轉求、而求聖寵、如無翼而欲飛、蓋聖母掌聖寵之庫、欲得聖寵、必宜求之掌庫者。昔者七年饑饉、若瑟掌王庫、衆民乞糧於法勞王。王謂之曰、去、求若瑟。吾人求主聖寵、主若謂吾人曰、去、求聖母。從此可知、祈求聖母、甚爲緊要。非然者、天主必不如是言、聖人必不如是論、教會必不如是勸勉吾人。一年內定多瞻禮、每主日定一日爲敬禮、各處立修會、特敬聖母、每日念三鐘經三次、恭敬聖母矣。余靈爾知祈求聖母、緊要若是、還不思盡心祈求耶。汝需聖寵、若

槁木宜露，旱田宜雨。汝居此世，災難聚爾身。魔鬼劫爾靈，急宜有慰爾救爾者。爾曷不向聖母懇切祈求耶。

二、祈求之益。○凡人祈求聖母，聖母即大展慈心，速來俯允。諸槐利諾云：凡求聖母者，聖母速來扶助。若有翼者然。默照經記曰：聖若望見一女子，身有二翼，飛至曠野。真福亞梅臺解曰：女子即聖母也。聖母助厥神子，如翼之飛，迅速之至。聖婦依撒伯爾急需聖母助佑。經記之曰：聖母速起興程。蓋聖母常側厥耳，聽人祈禱。卽或不求彼助，彼已助之不遑。況求

彼者乎。聖伯納定曰：聖母願施聖寵於吾，較吾願受聖寵，更為懇切。是以吾雖有罪，亦不阻吾祈禱之工。因聖母爲仁慈之母，若罪人非爲其哀憐之子，安有慈母之稱。既有慈母之稱，安有病癩之子，求母賜佑，而母不之佑哉。聖依諾增爵第三曰：求聖母而不覺聖母俯允者，我知必無聖伯納多向聖母曰：若有人求爾，而不得爾助，此人可不讚爾。利加爾道云：聖母不特如明月，遠行光照，且願助吾，勝吾所求。余靈爾知此旨，信乎，否乎。何故爾心恒冷，不求聖母藹然賜佑耶。須

與伯爾納多懇求聖母曰：至仁哉！童貞瑪利亞，望爾記憶。從未聞奔爾衛，呼爾佑，求爾救，而有一翹置之者。童身之聖童身者，我倚此而舒懷，即趨赴爾，歸附爾，哀漣之罪人，伏爾臺前，天主聖母，勿藐我禱，卽藹然俯聽，慨然垂允。亞孟。

三、不求之害。○凡人遠離聖母，而不思求之者，眞禍人也。聖伯爾納多云：如斯世無日光，照世將何成？黑暗而已。悚惶而已。橫行天下者，皆惡獸耳。靈魂亦然。若去聖母，靈魂黑暗，不明眞道，邪魔橫行，幽獄而已。聖安色爾莫嘆曰：憐哉！不向日

光之人，卽不敬聖母之人。耶穌會總長聖方濟各玻爾日亞，切願衆修士恭敬聖母。凡不求聖母者，聖人恐其不能久居會中，特行勸戒。且諭本會神師，另爲訓諭。凡不聽者，後皆出會。眞福亞冷，一日被重誘，幾至順從。聖母卽顯責之曰：若爾求我，必不至此。爾後宜改前行。余靈若爾不求聖母，誘惑一至，難免陷溺。戒之哉，戒之哉。

二十八日善終之保

一、聖母慰臨終者、懼前犯之罪。○凡人將死、多記憶平生缺
守誠命、怠盡本分諸罪。如盎帝奧古斯曰、從前所作之惡、我
今知之。且魔鬼將罪之重大、置病者目前、使之畏懼失望。想
罪犯已多、不知赦免與否、故憂悶幾至失望。我至此時、懼乎
否乎。然而我若恭敬聖母、聖母必早爲我籌、當我未死前、必
安置我靈、使我真心痛悔、定志改遷。聖儒斯定曰、瑪利亞約
束忠僕、使不妄行妄動。羅備爾篤解聖經蕩子之喻曰、使蕩

子有母，必不離家，卽或離家，亦已早回，不致如此受苦。若曰：凡爲聖母之子，終不犯罪離主，卽或離主，必及早回頭改過。亞道爾弗離俗進方濟各會，誠心恭敬聖母。臨終時，記憶世俗中所犯之罪，驚懼之至。聖母顯慰之曰：亞道爾弗，爾旣屬於我，爲何畏死？亞道爾弗一聞此言，畏懼全消，安然而逝。又有一鐸，特敬聖母痛苦。終時，懼己所犯之罪。聖母藹然顯現，謂之曰：子，母懼爾嚮欲減輕我苦，我今以天堂報汝。余靈，爾欲聖母慰汝，報爾升天之喜，當於生前，愛敬聖母。聖備爾克

孟曰、凡愛聖母者、必得善終。聖伯爾納多曰、凡人隨從聖母、終不離救靈之路。爾若求之、終不失望。得其助、顛仆無虞。得其領、弗覺倦怠。得其矜憐、爾能至終不失。

二、聖母慰臨終者、受當境之苦。○凡人當死時、全身痛苦、肉軀漸覺臭壞。魔鬼見時不久、盡力攻擊。當此苦境、能不憂從中來、懼形於外乎。然而恭敬聖母者、亦不必懼。因聖母賜我忍耐諸苦、聽主聖命。俾我稍補前愆、免死後當受之苦。此時聖母、雖未必親自顯現、然必助我慰我、堅固我心、忍受諸難。

魔鬼攻我，聖母必來救助。蓋聖母如大能之軍，魔鬼見之，速即逃遁，如風掃塵埃。聖文都辣云：聖母之名，魔鬼懼甚。終時呼之，爾可無懼。因魔鬼聞之即逃，俾爾神靈得安。又曰：凡真心呼其名者，聖母即遣天神下降，收其靈魂。聖未增爵灰里謫曰：聖母親來收我神靈。聖安德肋亞槐利諾終時，許多魔鬼前來攻擊。聖人即滿面黑腫，四體戰慄，目常流淚，首常搖動。少間，聖人回視聖母像，全心依賴聖母，輒獲大勝。畏懼之形，全然消滅。未幾，欣喜安然而逝。一司鐸名巴第奧爾者，臨終

時聖母顯現，魔鬼奔逃，高聲曰：聖母在此，無能爲矣。又名加皮利，藹爾利者，終時亦受魔誘。然因聖母扶佑，卽能克勝。喜而言曰：勝矣，勝矣。即起唱吾儕讚頌天主，認爲眞主。旁侍者接聲和唱時，安然去世。余靈人有聖母，何懼魔攻。因聖母終能戰勝。聖達彌盎曰：聖母大能之杖，能破諸仇。正如聖曲所稱之達未敵樓，充備戰具。臨終時，與人以干戈，同魔爭戰。余靈爾有何疑，尙不以聖母爲爾臨終主保耶。

三、聖母慰臨終者，懼身後之景。○臨終時，想將來之景，亦甚

可畏。死亡之苦，審判之威，救靈之險，無一非畏懼之端。然恭敬聖母之人，此時可知敬禮之益。蓋聖母爲我求主，賜我倚恃之情，而視死如安眠，離軀如出獄，審判如奏凱。故蘇亞類斯云：我未思及恭敬聖母，死時有如此甘飴，如此福樂。有一熱心恭敬聖母者，向皮南神父曰：詎知恭敬聖母，有若是之效，致我非常喜樂，不可名言。聖母現於聖若望，得得阿曰：凡爲我忠僕者，我必不離於臨終時。聖母顯示聖婦俾利日大云：我誠爲仁慈之母，凡人臨終，必來助慰，收其靈魂，至我聖

子之前。并爲其轉達。赦免其罪。送至天堂。未幾。聖婦之子陣亡。聖婦心內不安。聖母顯慰曰。爾子因我之助。已升天國。不必多憂。余靈。爾欲得此平安。不畏死亡之患。不畏審判之嚴。不畏救靈之危。當記憶生前恭敬聖母。爲聖母作何善工。行何善事。自然終時。無恐無懼。一心向慕天主。安逝聖母懷中。今爲爾計。當斷絕諸罪。以中聖母之心。竭爾心力。奉事聖母。且屢向聖母祈求曰。我等之生命。扶助我於臨終時。

二十九日怙恃愛慕救靈三法

一、怙恃聖母。○怙恃之情，總歸於三。一、不論舉行何事，一一託於聖母，使理治之。遠行者，以家事託聖母，若遇患難，求其輔翼。讀書者，求聖母光照明悟，俾學問日增，理道日明。如聖師多瑪斯及耶穌會博學士蘇亞類斯等是。選擇地位者，求聖母導引，不致差誤。修德者，求聖母領其前修，俾日進無疆，漸臻聖域。聖類斯公撒格曰：人無聖母助佑，決不成有德之人。默想祈禱者，求聖母默牖，如聖祖依納爵於孟來撒谷中。

有訓人之責者，求聖母賜訓人之能，如聖女加大利納每受人問，即舉心向聖母，念聖母經，然後敢答所問。行善工者，效法方濟各會一司鐸，每出外行天主事，先以魔像置聖母像足下，求聖母束縛之，不致橫行。一日，作事不成，即知未曾如前付託之故。歸至家，以魔像擲足下，而踐踏之，以逞其快。有治人之職者，託聖母代理，俾各得其宜。二、凡遇患難，即趨求聖母助佑。聖文都辣復書於友，論善生之法，凡二十五條，其中第十三條，告友於疑難中，託聖母助佑。昔瑪利亞名厄日

多者縱志作惡，後赴日路撒稜朝拜十字聖木，進堂時，覺有力者阻之，不得入內，遂向聖母像哀求賜佑，定志改遷，立時得進。有一總王，終時，不得領主，卽取頸中所戴聖母像，分一小塊，作臨終聖體。至夕，安然而逝。三，全全倚靠聖母，一無疑貳。如聖經所記瑪利亞瑪達肋納，及瑪爾大姊妹二人，見兄病重，卽奉書於耶穌曰：爾所愛者病，並無他語。足見倚靠吾主，毫無二心也。吾儕爲聖母之子，當如子依恃己母，不思扶助與否。非然者，不得聖母之助，且阻聖母欲賜之恩。余靈爾

自幼至今、不論何事、曾託聖母措置否。若有患難處、曾趨至聖母前求佑否。曾全靠聖母保護否。倘不如是、定志將行。二、愛慕聖母。○一、記憶聖母而愛慕、如火常燃不息。并留神於其所愛、用諸善法、以示不忘。故常常與聖母往來言語、如聖達尼老常論聖母善言善行、屢至聖母前、誦經讚頌。又如聖備爾克孟、到堂誦經、當念玫瑰經時、格外留神、有人近其側、彼不覺知。且每日九次跪念云、童貞瑪利亞、眞福之胎、懷姙永父之子者。噫、余靈前聖用諸善法、以顯愛慕聖母。爾亦

聖母之子，曷不留意於斯。二、當與聖母同喜同憂。一日，聖母現於聖女默底達曰：我女，爾欲行中我心之事，當思我懷孕吾主及產主之神樂。英國致命聖人多瑪斯，每日念聖母經七遍，爲記憶聖母七樂。凡主賜聖母之寵德，亦當誠心感謝。同喜之外，亦當同憂。聖母親顯於聖婦俾利日大云：世有多人，不愜予心，因不念我之痛苦。是以與聖母同憂者，得聖母非常寵錫，其蹟甚多，茲姑不述。三、愛聖子耶穌。因聖母甚愛聖子，故其願人愛之，超越尋常，令人莫測。且明知愛聖子者，

可受無量恩寵，亦爲愛人之故。願人常愛聖子。卽如聖若亞敬、聖婦亞納、及淨配聖若瑟等，聖母願我一一愛之。蓋其所愛者，亦願人愛之不忘也。

三、救人靈魂。○救人靈魂，爲吾人大益之事。譬之友人，適被火災，必往救之。友人之物，最珍最寶者，必盡力救出之。今罪火延流世界，焚燬天主聖宮、聖母寶座。吾儕爲厥子者，自宜竭忠盡智，救其所寶之靈魂。或痛哭人靈喪亡，或導引罪人改過，或力勸外教進教，或行祈禱之工，求主恩賜中邦教化。

大行。如梅瑟舉手向天求主，賜民戰勝之力。余靈，汝宜祈求
聖母，開聖寵之庫，俾普天率土，教會興隆，異端消滅。犯罪者，
回心向主。冷淡者，漸臻聖愛。

三十日感謝恭敬熱心三法

一、感謝聖母。○感謝爲知恩之據，并得新恩之善法。受恩而不知感謝，大拂賜恩者之心，而卽斷恩寵之源。聖母在天，雖不需吾人感謝。然見感恩，爲吾亦有大益，故甚願吾人感謝天主，及已所施之恩。而感恩中第一妙法，卽一心樂受聖母加我之恩。不論大小，母以所賜之恩，不全符所求，而生怨恨。因恩之爲我有益與否，聖母一一知之。故其賜我者，必最稱我靈之要。余靈爾得聖母之恩，母嫌大嫌小，致傷聖母之心。

第二妙法。卽顯揚聖母之恩。爲此自古信友。凡受聖母恩者。卽獻禮傳揚。倘爾所受之恩。不便顯揚。當告諸天上神聖。代爾顯揚。代爾感謝。第三妙法。若因聖母護佑。而善成某事。卽以此事之光榮。全歸聖母。如方濟各保祿。每顯奇蹟。必感謝聖母。一日。愈一癡狂者。卽諭衆修士至聖母臺前。同唱申爾福一遍。以揚聖母功德。又有一修士。凡行哀矜。除瞽目跛足外。終不親自交付。必置錢於聖母臺下。令貧者自取。人怪而問之。答曰。余欲衆知哀矜者。非予實聖母。余靈至今何如。爾

自省之。以後何如。爾自定之。

二、恭敬聖母。○朝拜天主之外，首當欽敬聖母。在諸神聖之上。欽敬之法，有內外之別。內者，如敬聖母之寵德，或思聖母之廣大。或在聖母臺前，謙己自下，并以神聖之讚美，獻於聖母。種種妙法，不勝枚舉。外者，如敬親聖母像，或虔稱聖母名，卽如點燈燭諸禮，亦不可廢。蓋人有靈魂肉身，肉身當助靈魂之不及。每有在外不行敬禮，則在內亦無敬心。故欲在內常存敬心，必當在外恭行敬禮。內外相助。再者，或敬禮聖母。

聖物、或敬禮聖母聖像、或善行聖母瞻禮、或且於瞻禮前、虔行九日敬禮、或守齋克苦、或告解領主、或朝拜聖母堂、或於瞻禮七日、另敬聖母、或行哀矜、或建造聖堂等、其法甚多、有志恭敬聖母者、自裁之可也。余靈汝自生至今、曾用此善法否。倘未曾用過、當立定志向、嗣後用之、以敬聖母。

三、熱心祈禱。○首顯熱心者、爲光榮聖母而與祭、此乃最中聖母之心。前有二鐸、道經異端地、適值聖母瞻禮、卽定志舉行彌撒。其一、作祭時、異端人闖進、剪厥舌、加以重傷、其伴卽

領至修院，在聖母臺前，祈求療治。聖母顯示云：彼所行者，甚愜我心。我欲賜之以舌。二、愛慕朝拜聖體。因吾主之體，亦是聖母之體，聖母淨血所成。倘爾全力倣效聖母，善備領主，則更中聖母之心。三、屢誦聖母經。因此經最尊最寶，聖母所最愛者。有一賢人云：每聽此經，天爲之喜，地爲之驚，魔爲之逃，人心得安慰，而堅志行善。四、念聖母小日課。如類斯聖王，雖事煩無暇，終不缺失。五、善念玫瑰經。念此經者，可得無數奇恩。聖母諭聖多明我，令其訓誨世人曰：凡誦此經時，想耶穌

及我生平事實，我必援拔於惡，提進於善，護庇於難，斂束於順，生死不棄不忘。一日，聖安當出外，路中黑雲盛起，大雨下降，聖人以玫瑰串置於頭上，雨不近身。余靈爾宜效法耶穌會修士聖亞爾方騷念珠從未脫手，以致指上生疥。六、虔念教會所定經文。如亞物海星，我靈感頌吾主，天上母皇歡樂，天主聖母切我罪人，及聖母德敘禱文等經。七、早晚託已於聖母。如子女晨昏定省，此乃聖達尼老所習行者。卽念聖類斯所作之經文，吾主后聖母瑪利亞云，或別樣經文，亦可。

三十一日克己則效傳揚三法

一、克己苦身。○克己有內外之別。內者，一、在主前羞赧。因己無功無德，惟有罪愆。二、真心悔恨。因主至仁至慈，賜我多恩，我不惟無德可報，且犯多罪，侮辱天主，而以怨報德。三、全聽主命，忍受主罰。不論何災何患，何病何痛，甘心樂受。外者，如嚴齋、少臥、苦帶、苦鞭、苦衣等，另尅私欲偏情。此蓋聖母親自力行，而甚願吾人則效者也。聖母獻己聖子，全置聖父之手，以贖我罪。故吾主受難之事，常往來於聖母心中，而刻刻不

忘。吾儕效法聖母，得不以克己之工爲要務，而受其大益乎。至論其益，聖人備述，茲姑畧叙一二。聖人云，克己能增聖寵，使靈魂超諸塵外，默想主事，能補已犯之愆，能防未來之患，能加天上光榮，能息天主義怒，能阻魔鬼劇誘，能作祭主犧牲。至論其要，不難推測。蓋原祖犯罪後，肉身亂動，常逆靈魂之命，倘無嚴齋克己等工以治之，勢必易於犯罪，致靈魂有傾覆之患。故爾宜加愼克苦，特於聖母瞻禮前，另行苦工，以顯愛敬聖母之心。前聖加祿每逢聖母瞻禮，必守齋預備。聖

尼各老及諸他聖。每瞻禮七。亦然。余靈爾旣知克己。如是緊要。如是有益。還不思加謹否。如克饕。克渴。少食。少寢。慎防五官等。皆克己之工。何不稍行之。以敬聖母。自今而後。當勉力爲之。

二、則效聖母。○凡二人相愛。必甚願相似。聖文都辣訓人曰。爾願常侍聖母之側。而欲聖母撫慰。最捷之法。即盡爾心力。則效聖母。聖母諸德全備。皆可爲爾師法。聖多瑪斯云。爾欲知聖母與諸聖之別。當知他聖之超越凡人。或在熱心。或在

克苦、或在良善、或在謙遜、或在他德。而聖母諸德全備、并遺夫其極。爾宜效其信德、若何誠實、效其望德、若何堅固、不論何患、莫能搖動、效其愛德、如審之火、炎炎不息、效其熱心、日夜不忘天主、效其謙遜、忍耐、仁慈、聽命、默靜、端正、勤儉、及諸美德。修道者、另效其貞潔、神貧、聽命、守貞者、另效其潔淨、端正、默靜、節制。有家者、效其忠貞、敬夫。且所穿之衣服、宜端正、毋太污、亦毋太麗。節婦者、杜門不出、如聖母於耶穌升天後、足不出戶。欲嫁娶者、效聖母順聽主命、總之、不論何人、當效

聖母預備善終。然欲得此恩，當如聖母屢思終期，一切世事，安置清楚。且盡己心力，行善立功。死期將近，善治靈魂，甘受天主定命，發諸善意。死期一至，或訓誨子女，或勸戒同輩，或感謝長上，或求免過失，或託人轉求。如是效法聖母，得謂聖母孝子。

三、傳揚敬禮。○天主嘗曰：我不給人光榮，獨於聖母不然。天主不特不阻人光榮聖母，且極願吾人加意傳揚。試思普天之下，凡敬天主者，無一不傳揚聖母光榮。倘此非天主所欲，

我知必不至此。且聖母爲吾靈之益，亦甚願吾人揚之不替，敬之無終。聖人有云：天上神聖，見人恭敬，尙肯轉求護佑，況聖母乎。然而傳揚之法不一，或著書立說，或講道勸人，或建造聖堂，或傳佈聖物，種種善法，不可枚舉，皆所以導人敬愛聖母，事奉聖母者也。余靈，或此或彼，請爾量力而行。然行之須果毅，終不廢弛。如是，則過此聖母聖月，不但自己多積善工，爲將來永報之資，并使敬禮聖母之熱心，長延於世而不絕矣。

Bre
5

11010

C

6.1